



明
卷
1574
30

嘉興府志卷五十八

平湖縣

兩廡先儒

兩廡

陸隴其初名龍其

總功讀書躬行

廣茂進士乙卯

博學宏詞

...

嘉興府知府...

嘉興府志卷五十八

嘉興府知府善化許瑤光重輯

平湖縣

兩廡先儒

國朝

陸隴其初名龍其

按陸氏靖獻支譜初名世穗

字稼書居泖上世有隱

德幼讀書躬行實踐以聖賢為己任年四十一登康熙

庚戌進士乙卯授江南嘉定知縣嘉定為瀕海大邑號

稱難治俗尚奢侈民多積逋令率坐是落職隴其至嘆

曰民不輸賦大率以貧也其所以貧風俗為之也譬如



少年以遊冶傷其元氣力不能服勞爲父兄者禁其遊
冶則元氣自復不禁而予以飲食抑未矣今且不爲飲
食而又督過之則官與民俱病固其所耳故其爲治一
以鋤豪強抑胥吏禁侈靡變風俗爲主大賈汪氏者素
橫行邑中其僕奪賣薪者妻汪匿僕急捕治之以妻還
賣薪者而重懲其僕汪大恐令所識探意隴其曰人無
不可自新苟爲善卽善矣若平日所爲吾知之毋犯我
自新未晚汪感懼卒爲善士市少年十百爲朋以拳勇
爭豪鄉黨畏苦之隴其廉得其名不卽捕遇有控者責
而械諸門時時勸諭之視其情色果悔則釋不匝月其

黨悉解散民有告其子不孝者卽涕泣自訟曰我德薄
無以化汝令汝父子至此委曲曉諭時其父泣其子
亦汪然出涕已而察其深悔乃慰遣之并不與杖大場
鎮有兄貧貸于弟不應輒昇弟貲以去弟賄巡檢以盜
報則怒曰是可以爲盜乎訊之乃其弟婦翁所爲痛懲
之因呼其弟曰彼兄也乃聽婦翁謂兄盜不悌也答之
又呼其兄曰汝爲長不自思謀生之策而貸弟弟不應
而徑取之陷汝弟不悌是汝不友也亦答之咸感服而
退宦家子有罪延其父至堂上而責之曰我與爾父朋
友也爾猶子也子弟而不肖不可以不責竟杖之邑胥

役以千計惟輸解上官乃遣役絕不令至民間民亦信其愛已不待役至賦稅先期畢集未幾胥役易業自去者過半其存者亦相率告哀曰某等知公清慎豈敢有所覬但工食已裁革無所得食業受役不可脫脫亦莫肯代惟公哀之隴其惻然曰若亦我民也然無術救汝無已令汝曹得更代如何皆歡然曰如是則生矣乃悉爲農賈以自給當直則來于是廩有存者期年政成丙辰冬福建按察使員缺

上命九卿會推天下賢能愛民之官將不次擢用尙書魏象樞舉隴其而是時江蘇巡撫慕天顏方以隴其儒術迂疎非肆應才具疏入告部議引才力不及例降級調用嘉民大駭罷市日號軍門天顏不自安爲具疏請復而部議又引諱盜例落職先是民張與汪以小隙訐訟汪遇盜被傷歸謂其弟曰張遣殺我其弟遂以讐殺控隴其疑小隙無殺理而察張亦非殺人者因以是盜是讐未敢遽定報尋獲盜七人讞上部議以隴其初詞涉諱匿引例罷斥人謂隴其盍辨諸隴其曰邑有盜長吏固宜有罪且夜半殺人于路果讐亦盜也而我不能斷議黜不枉奚辨爲嘉民益大駭去之曰九鄉二十都民夜半羣呼入邑填滿街衢哭聲震天地及入邸舍男婦萬餘

環泣不去者終夜次日四郊各刻木爲位旬日間村各立祠旌幢鼓吹爭迎位于其中旣歸行李蕭然惟書數卷及其妻織具而已故民謠曰陸公歸舟何所裝圖書數卷機一張戊午

詔舉博學鴻辭之士郡人工部主事吳源起薦入都會左都御史魏象樞疏論前部議之非

上心領之未幾以憂歸服闋象樞復上疏薦奉

旨復職癸亥補靈壽知縣旣之官視其邑逼近畿輔多徭役地磽瘠水旱頻仍俗強悍善鬪少訟而輕生嘆曰民富而後可以教輕生之習禁令尤嚴然未盡絕者民貧而不

知義也嘉定可使富而不及爲靈邑又非嘉定比奈何力言于上官非大恤民力不可時派運灰車靈邑以五輛視他邑獨多前令董子祁爭之不得民以病告隴其首以爲請至以去就爭乃得更代邑又北負太行南濱滹沱多不毛之士順治康熙間兩奉

詔盡蠲其徵後言者復申隱地處分例有司畏罪稍稍首報由是倚山瀕河之地間可耕穫者相戒不敢墾隴其下令民墾謂

朝廷決不與爾民爭此毫末之利地方官苟非大貪惡決不勒爾起科以貽爾無窮之害民乃漸有關者終任七年

竟無一畝首報邑額丁萬五千有奇前令編審率增丁
 逃亡死絕不除而難派包賠日甚隴其謂如是是驅之
 逃也因以實額報且曰裕國之道惟在恤民逃亡日少
 則國課日增若目前形勢恐難就筋疲力盡之民責其
 無缺額也庚午歲大饑奉

詔發粟賑民裹糧驅馳山谷間審其眾寡老弱躬自徧給及去
 民懷其德如在嘉定時初江南總督于成龍卒

上臨朝問九卿今天下清操如于成龍者有幾人九卿頓首以
 七人對隴其與焉

上又嘗問兵部侍郎李光地曰今天下亦有留心性命之學者
 乎對曰臣所知者有山東布政使衛旣齊靈壽知縣陸

隴其臣曾見隴其所著書皆有本之學
 上又問隴其居官何如對曰清廉愛民屢經大臣薦舉至是左
 都御史陳廷敬復薦有

詔行取來京擢四川道御史遂上疏言畿輔民情
畿輔民情疏

蒙 皇上拔置臺班苟有一得之愚皆當次第敷
 陳以仰佐 聖治之萬一願臣官畿輔者久知畿
 輔之民情敢先為 皇上陳之畿輔邊山一帶土
 瘠民貧異於他方荒多熟少自昔而然加以康熙十二
 年以後軍興緊急雜派繁多民困滋甚豐年僅可支持
 一遇水旱流離萬狀幸數年以來 皇上加意撫
 綏禁止私派不恤蠲賑鳩鵲之民得苟延殘喘然以言
 乎家給人足則尚未也臣觀自古豐亨之治皆非一日
 而成唐虞之世其初亦不免黎民阻饑堯舜兢兢業業
 積久而後烝民乃粒漢自高惠而後多方休養至於文

景然後天下殷富唐之太宗日夜講求治道至貞觀之末然後民食充足今天下平定猶未久也而又疊遭水旱故無怪其然矣求其殷富亦無他道惟在皇上常持此勤恤之心期之以積久而勿責效於旦夕思已厚而不嫌其更厚心已周而不厭其更周則家給人足之盛庶乎可望矣至于目前所當議者臣見上年畿輔荒旱實異尋常其被災各州縣內雖有未被災之處亦不過稍有升合之獲差勝於被災者耳初奉上諭將二十八及二十九年上半年錢糧盡行蠲免已經撫臣出示曉諭後因部議分別被災州縣中有不被災地畝不准槩蠲百姓甚苦撫臣不得已題請秋後帶徵舊臣恐非積貧之民所能堪也雖曰豐年所入幾何穀價又賤其值無幾私債之迫索者衣服之典當者已去其大半仰事俯育仍憂不足又可責其兼完新舊之糧乎若非皇上曲加垂恤臣恐有司惟知考成之是急不顧民力之難勝甚非皇上蠲免之初意此臣所目擊地方情形不疏入

上呼隴其近前日陸隴其奏章是自作否對曰疏出臣手不敢

假人

上稱善久之尋奉

詔盡行蠲免時湖廣總督某為湖南巡撫于養志奏請奪情隴

其上疏論之論奪情疏臣辦事衙門聞九卿科道會議淺不在會議之例不知所議若何及詢問與議諸臣謂議之時昌言其不可者固有其人而依回不斷者比比而是臣竊怪之此明白顯易之事有何可疑而依回若以夫治天下之不可不以孝易明也在任守制之非所以教孝易明也天下正當承平之時湖南又非用兵之地無籍於在任守制易明也皇上以孝治天下在廷諸臣沐浴於耶且臣不知議者以于養志為何如言以直斷其不可耶且臣不知議者以于養志為何如人如其非賢者耶則固不當使之在任守制矣如其誠賢者耶則必不肯安心於在任守制矣在督臣代為題

請或從愛惜人才起見然臣以為使之解任全孝正所以深愛惜之況皇上一日所行天下萬世奉為法程者也若使一撫臣因督臣之題請而留將來督撫之丁憂者皆將援此為例其不思僥倖奪情者鮮矣名教自此而弛綱常自此而壞此端一開關係天下實非淺鮮至湖南一省之人是則是倣不復知有父母又無足論矣竊以為督臣所請無容議可也臣不知九卿作何啟奏理應靜聽

詔報可辛未夏旱應

詔陳言部議革職奉天安置

上心知其無他特宥之是年冬試俸滿改調歸又一年而卒年

六十有三四方人士聞者莫不傷悼嘉定之民縵經相弔哭于清廉書院中及至葬門人會葬者皆伴墓三宿

而去隴其學本朱子以居敬窮理為要嘗與睢州湯斌書畧曰孔孟之道至朱子而大明四書經傳凡經考定者悉如化工造物學者但患其不行不患其不明但當求入其堂奧不當又自關門戶自陽明王氏目為影響支離倡立新說盡變其成法援儒入墨以偽亂真天下靡然響應棄規矩而師心自用比之清談禍晉非刻論也今之學者必尊朱子而黜陽明然後是非明而學術一人心可正風俗可淳也又嘗曰南方有一黃藜洲北方有一孫夏峯皆當世君子然夏峯作理學宗傳混朱陸陽明為一藜洲學案亦尊戴山太過其論學類如此

嘗跋張武承王學質疑自以關姚江之學比于孟子關
 楊墨于有明諸儒獨心契薛敬軒胡敬齋羅整庵陳清
 瀾為學術正宗晚年設教東洞庭山學者從遊日益眾
 著有讀禮志疑六卷四書講義困勉錄三十七卷讀朱
 隨筆四卷三魚堂賸言十二卷松陽抄存二卷三魚堂
 文集十二卷外集六卷附錄二卷以上入四庫全書松陽講義
 十二卷問學錄四卷禮編四卷戰國策去毒二卷靈壽
 縣志十一卷衛濱日抄先正一隅集生平坐必端行必
 莊語必徐以簡燕居齋如不苟訾笑天性孝友父標錫
 歿時隴其方應召都門訃至徒跣奔喪歸孺慕哀泣日

夕席地卧期年乃以土坯墊四隅而寢其上所制喪服
 皆遵朱子家禮性謙謹和厚善氣迎人告戒僮僕亦煦
 煦若子弟及辨學術是非邪正論民生休戚政事得失
 又侃侃絕少依回云隴其既卒之三年春有提督江南
 學政之命大學士王熙以病歿對

上曰何故不奏對曰七品以下官向無奏病歿例
 上嗟嘆良久曰本朝如此人不可多得矣雍正丙午
 詔從祀孔子廟庭位列先儒蔡清之次乾隆丙辰

子諡清獻追贈內閣學士兼禮部侍郎本傳

雍正二年甲辰三月初一日

皇上臨雍諭禮部等衙門及國學諸生治天下之要以崇師重道廣勵學宮爲先務朕親詣太學釋奠先師禮畢進諸生於彝倫堂講經論學凡以明道術崇化源非徒飾園橋之觀聽也惟

孔子道高德厚萬世奉爲師表其附享廟庭諸賢皆有羽翊聖經扶持名教之功然歷朝進退不一而賢儒代不乏人或先罷而今宜復有舊缺而今宜增其崇祀崇聖祠者周程朱蔡外或有可升而附者並先賢先儒之後孰當增置五經博士以昭崇報均關大典九卿翰林國子監詹事科道會同詳考定議以聞禮部等議周漢唐宋元明外

本朝應增入從祀者一人國家右文興教凡務本力行之士沐聖人之化淬厲於天人性命之學者實繁有徒其彰彰在耳目者當以平湖陸隴其爲最隴其自幼以斯道爲己任精研程朱之學兩任邑令務以德化民入官西臺奏章必抒誠悃平生端方孝友笑言不苟著作如林能發前人所未發絲毫不詭於正足稱昭代醇儒允宜陪祀俎豆者也疏上奉

上諭先儒崇祀文廟關係學術人心典至重也宜增必詳加考証折衷盡善庶使萬世遵守永無懸擬爾等所議雖皆有功經學然戴聖何休未爲純儒鄭衆盧植服虔范甯謹守

一家言轉相傳述視鄭康成之純質深通似乎有閒至若唐之陸贄宋之韓琦事君以誠立身以正勳業昭垂史冊自是千古名臣然於孔孟心傳果有授受而能表彰羽翼乎其他諸儒是否允協以及宰予冉有增置博士之處著再公同確議務期至當不易具奏禮部等復議上宜復者六人林放蘧瑗秦冉顏何鄭康成范甯宜增記者二十人縣賈牧皮樂正子公都子萬章公孫丑諸葛亮尹焯魏了翁黃幹陳淳何基王柏趙復金履祥許謙陳澔羅欽順蔡清陸隴其宜入崇聖祠者一人張迪宜增置博士者四人冉雍冉伯牛子張有若奉

旨朕

念先賢先儒扶持名教羽翼聖經有關學術人心爰命九

卿詳議今諸臣參考周詳評論公正甚合朕心著依議行

於四年正月從祀乾隆二年

賜諡清獻

列傳

明

沈琮字公禮正統壬戌進士授南武庫主事兼車駕職方武選三司遷守夔州改重慶皆以父母喪不赴再補廣州興學校正風俗勸農弭盜爲他郡最值葉盛爲巡撫言無不聽及盛移任琮卽以病乞歸家居奉先事長教子弟有儀範鄉人化之著有石窗東宇等藁弟肆字公

貴號青壁景泰辛未進士累官山東道監察御史著有橋門柏臺等藁程朱語類父母喪琮肆廬墓六年日啜粥有白鶴時來棲止詔旌其門琮先世本烏程人元末有文俊者徙家海鹽之清溪琮其裔也宣德四年析隸

平湖縣 徵獻錄參柳志

馬瞻 一作璇 字季明少時薛瑄見而奇之曰神韻雋遠必為

一代偉人以進士任行人歷使晉周楚蜀諸藩出使琉球餽遺無所受中山王為立郤金亭擢御史疏奏蚤建儲謹災異飭武備防水旱上嘉納之書其名於御屏父昇見孝義兄子昆見下 徵獻錄參平湖程志

沈榮字元節以進士授工部主事知潮州以鹽稅入公帑

省正供歷延平臨江所至不畏強禦莊景稱為清沈陞

貴州參政糧運軍餉裁制有方乞養歸著有熙貝集孫

聖進士歷知山陽鹽城縣垣見下 徵獻錄參分省人物考江西志

倪輔字良弼以進士授吏部主事遷郎中改禮部陞湖廣

參政治峒猺以恩信卒官民哀之如失父母

許盛字昌世以進士授刑部主事歷員外郎擢四川按察

僉事蜀府莊戶侵民山田獄久不決盛勘實置法丁憂

起補分巡川北道僉事儀隴寇亂誅其首餘黨悉平改

川西上流羅泉諸井鹵丁憤所司徵不如令塞其井盛

至帖然復業轉雲南副使民有鬻銅者讐家誣以盜礦

獄具瘐死已半盛辯釋之民尸祝焉

以上浙江通志參徵獻錄

俞迪字允吉以貢任廣東都司斷事性耿直指揮王江失

機監司惡指揮于某欲并坐之以屬迪迪不可乃止某

潛以千金餽卻之迨歸某輓轍至含泣拜曰不敢忘大

德願以弱息奉箕帚迪曰以妻次孫可某益感結婚而

去

分省人物考

陸綸恩貢生知夾江縣以廉稱署中器用出自里甲鋪戶

給還之羨餘一無所取丁艱歸築舍墓旁居之

平湖程志

周衢字士亨景泰庚午舉人授膠州學正以禮率人諸生

有衣食不給無力喪葬者出俸助之罷歸肆力經史根

極性命之學所著詩文力追古人

分省人物考參徵獻錄

陸銀字克潛由貢生授程鄉知縣縣屆山海多盜議者皆

以捕盜為急銀謂與民未有恩信何遽勞民乃新學舍

以禮義勵諸生問民疾苦晝夜不息期年始團練義勇

間出勦斬獲常至千百盜相約無犯俗構訟以賂勝銀

絕私謁訟自息丁母憂歸號泣攀轅者數千人行至常

山哀毀致疾卒囊無一錢逆旅主人徐文育為之棺殮

程鄉人設位巷哭立祠祀銀性至孝父珪患癰吮之而

愈母畏雷雷輒晝夜侍累贈副都御史子淞孫杰別見

兄子溥字文博諸生以貲授上海縣丞調豐城督運夜

過采石舟漏跪禱曰舟中一錢非法願葬江魚腹禱畢

漏止天明視之有三魚裹水草塞漏尋以亢直罷官歸

兩浙名賢錄參徵
獻錄鄉賢實錄

過璘字太璞少喪父年十九猶市販一旦棄去力學成進

士授工部主事出督呂梁洪河道復分司濟甯闢大爲

三原王恕所知改刑部主事有以妖言誣人至死連及

數十家璘勘出之陞江西按察司副使豐城李民泰陷

平民兄弟三人爲盜繫獄十年得其情釋之坐民泰尋

致仕歸

分省人物考
參平湖朱志

屠勳字元勳以進士授工部主事遷刑部郎中京師無賴

子李勝令人誘其主李福盜鑄而已首之福坐戍邊籍

其產歸勝勳覆勘得實以其罪罪勝值大旱因建言陰

陽不和由於刑獄不清輦轂之下尚須平反况在外省

請遣部臣卹刑獄從之累陞右副都御史巡撫順天永

平諸路邊備上言近畿供應浩穰宛大二縣庫夫壇役

旛夫羊水瓜戶役動數千而計丁養馬與各縣等尤困

乞加存撫又奏密雲孤懸戍壘難援潮河川積石漫衍

難守黃花鎮先帝陵園宜護乞分薊州密雲建昌連設

三屯烽火相應于潮河川作周城虎落具躡石布蒺藜

鑿坑窖而于內埭石為城增置黃花鎮營堡禁中使索
 供銀魚罷麻峪采礦又奏移操營于熊兒峪移關於水
 峪使兵得水草又便耕稼歲省卒戍公私金錢不貲遷
 刑部侍郎壽甯侯張鶴齡與民訟田勳曰母后族與細
 民爭尺土非國體歸田于民正德元年上郊祀籍田幸
 學三事請講真德秀大學衍義為正心之要時上年少
 務嬉遊卒有劉瑾江彬之亂人服其先見進尚書劉瑾
 用事乞奏請必先關白勳曰若是是無朝廷矣瑾銜之
 引疾求去加太子太保致仕卒賜祭葬諡康僖著有東
 湖遺稿子應埧應坤應垓俱進士應埧湖廣提刑副使

應坤雲南參政應垓見秀水列傳

浙江通志參徵獻錄

沈珪字廷瑞以舉人授延平府推官改安慶有清望上官

至不敢責供張子鐘黃梅教諭孫一卿宗人府儀賓尚

荆王崇明郡主

徵獻錄參平湖張志

屠熙字元明以舉人授武昌府推官有盜久弗決俱年未

三十熙曰此獄越十八年矣盜時年纔十二三審出之

陞江西建昌府同知益府中人籍民貲戶派借銀責重

息諭以利害遂戢改南直太平知府卒子奎字文奎御

史巡視江西翦戢宸濠黨與復累疏其不軌終江西參

政查別見

徵獻錄參平湖程志

陸愈字抑之以進士知江都縣躬歷窮僻鄉里詢民疾苦
 瀕江田已盪為洪波稅額不除淤沙可耕率為豪右佔
 馬多領牧于無丁產者悉為節約均賦歲凶民多鬻子
 女子江南捐俸并公餘錢贖還幾百人每新穀未登輒
 發舊廩以接民食巡撫李某籍所部羨銀十數萬將上
 之特請留以活窮民又教民開渠建閘備旱澇奏置巡
 檢司為縣控制召拜御史巡按四川鋤豪強發諸姦伏
 上自藩邸下及羌酋咸凜凜莫敢縱大修成都郡學創
 養濟院於營昌出成案之不能生者亡慮百十以盛暑

按部得疾卒

徵獻錄參分
省人物考

馬昆字克昌以進士知永新縣峒獠入境肆掠禽其首平
 之隣縣民構訟二十年不決以屬昆片言折服縣有商
 稅令易粟實常平倉擢山東道御史出按兩淮鹽課酌
 其贏羨以賑饑值河溢以餘鹽易價充築堤費淮人立
 祠尸祝遷雲南副使進本省參政卒官
徵獻錄參
平湖程志
 馬俊字世英以舉人任館陶縣教諭人罕知學俊為句授
 字解捐俸資給之遂有以科名顯者擢知獲嘉縣大瑞
 張永征安化所過騷然俊言民力不任供億永斂容謝
 調遂平遂平故無城有賊寇俊匿母妻山中而身率丁
 壯畫地而守人皆感奮殊死守賊不敢犯事平乞歸祀

名宦贈山東參政 分省人物考 參徵獻錄

陸淞字文東進士授禮部主事歷郎中時藩國多踰制請
乞淞格不行倭使宋素卿賄奄人劉瑾求數八貢淞上
疏言非中國利且素卿本甯波人潛通外島以邀中國
請誅之瑾怒中淞他事下獄瑾敗遷光祿少卿歷南鴻
臚卿上疏陳九事極愷切尋陞南光祿卿致仕卒賜祭
葬淞接人甚溫及臨事毅然不可奪自奉儉約好周恤
故舊宴客酒七行卽徹有東濱集累贈刑部尚書子杰
杲並有傳 徵獻錄 參吳志
曹瓊字玉夫以進士授御史賞戚有投千金乞置讐家于

辟正色卻之尚書劉大夏論人才謂諫臣中如曹瓊當

大用無何卒子乾六歲孝宗時以神童舉試宮中賞賚

優渥元舉人 徵獻錄 參 平湖程志

施震字亨甫以進士知固始縣行取補太僕寺丞出守石

阡俗皆誅茆爲屋令儲水備火忤劉瑾乞歸 浙江通志

沈煉字剛夫以進士歷任江西參議所至豪右屏息墨吏

輒自引去值寇警煉以文臣飭武事身赴險難卒撲滅

之子圻字子京以進士除江西道御史以忤當道降高

郵州判陞休甯縣歷陞貴州參政投劾歸 徵獻錄 參吳志

屠堯字文治以進士授常州府推官擢雲南道御史巡按

廣西歲饑設法糴運增價招商多所全活招降諸徭寇
賜金幣世廟入繼大統議考興獻皇堯六上疏力爭轉
山東副使致政歸杜門不入城市三十六年

劉志

沈圻字子京正德辛未進士除御史以直忤當道謫高郵

州判陞休甯知縣天心冰蘖歷固原兵備發巡按之奸

陞貴州參政歸父子俱官藩臬產不及中人

于志

潘鵬字惟遠以舉人授肇慶府通判有清操不滿考自劾

罷歸貧甚授徒為活學者稱東淵先生同時李萼字剛

甫亦以理學自命不苟取與以為聖人可學而至嘗作

克念圖說司業沈懋孝為作兩介士傳

徵獻錄參
構李詩繫

孫璽字朝信以進士除興化知縣豪徐恩以貲為本縣千

戶與其宗人交賂權貴橫行無忌璽至廉得奸狀先懲

其宗人翼日百姓以恩殺人攫財告鞠實併其宗人皆

抵死大水傷稼上官不為請即自奏聞詔許減田租之

半轉揚州府同知甯庶人攻安慶璽守儀真捕殺儀賓

之為賊謀者陞山東按察司僉事奉敕文皇莊草場凡

中官貴戚所漁奪者悉還民調雲南參議麗江土官爭

金沙江相讐殺璽會勘土官賂同勘者因以賂璽不能

動卒奉約束如故移巡大同兵備吉囊入寇斬首多敘

贊畫功賜金罷歸以子植贈刑部尚書植有傳

平湖顧
志參唐

順之撰墓志徵獻錄

陸琳字文珮以舉人授清河知縣歲祲撫濟全活數萬俗不諳紡織乃教之為車機有兄弟訟久不決琳諭以義感泣相讓擢廣東道御史巡按四川都指揮劉永昌倚武定侯郭勛權勢與蜀府訐奏按實致永昌罪補河南道論罷中貴姻亞墨吏繼劾權黨邊將張麟怙勢不法事不報出守江西撫州府尋乞歸著有蘭臺疏稿忠弼堂稿巡川條例賑荒事宜子山豐宓

姚參

榜姓張

字應辰以舉人授上饒教諭擢知宜春縣出穀賑饑興利除害又請減茶貢費十之九甯庶人之變王

守仁檄參應援事平調桐廬尋擢工部郎中乞歸子篚別見簣笈並舉于鄉孫體信進士官參政

以上分省人物考

趙漢字鴻達以進士授建昌推官錄重囚必察其寃不拘成案擢南戶科給事中改兵科中官崔文亂政尙書林俊劾之被旨詰責漢因發文不法狀請行譴不納已哭爭大禮論列張璫桂萼所奏十謬詔繫獄廷杖厯吏科給事中以疾去起故官遷工科都給事中疏言內閣桂萼翟鑾稱病三月未嘗以曠職辭張璫久專政權亦未聞引賢其濟乞諭萼鑾亟去簡用兩京大臣及家居者舊復被詰責尋出為陝西參政告歸久之以故官起山

西不數月復致仕著有漸齋集

明史劉世揚傳參兩浙名賢錄徵獻錄

林桂字天芳以進士授刑曹執法忤權貴下御史獄世宗

入繼詔拔淹滯超授禮部郎中子雨別見

徵獻錄參分省人物考

陸杰字元望以進士授兵部主事轉員外郎中武宗南巡

與黃鞏陸鎮伏闕極諫廷杖陞湖廣參議歷陞陝西副

延副使榆林告急上遣總兵某往援至則屯兵綏德不

進杰率屬下梁張諸將擊退之遷廣東左布政使安南

不庭毛伯温督討杰偵得安南陰事謂可讐服不煩用

兵伯温以聞安南王莫登庸果上表請罪遷僉都御史

巡撫湖廣世宗奉章聖太后梓宮南禱供應浩繁杰處

分若素定民以不擾督山陵工請乞留正供為費又乞

捐所過郡縣租稅俱報可修復江漢長隄二千餘里即

本官進工部侍郎轉副都平鎮溪苗亂又討平邵陽妖

賊為大璫廖斌誣奏致仕久之御史王應銓疏薦以原

職召還工部卒贈尚書子光弼蔭授都督府都事孝友

能文章曾孫鼇

兩浙名賢錄參徵獻錄

劉玘字延璧以舉人知五河縣歲大饑設法賑濟全活數

千人復即家運粟補其不足務端俗尚興教化先是縣

令姜某有循績民為之謠曰前姜後劉吾民以休擢刑

部主事卒祀名宦

分省人物考參徵獻錄

陸槐舉人知萬年縣民有兄弟相訟置不理久之召與語為說棠棣之詩及脊令在原曰鳥亦有兄弟况於人乎

兄弟感悟訟遂解祀名宦

平湖程志

陸鼇字子任九歲淹貫名理人稱小象山以舉人授臨江府通判時江盜橫甚鼇單騎諭降之而巡撫吳某意主勦鼇爭之不可曰殺人媚人鼇不為也吳悟乃止督糧使者至索金不與怒甚及察其實貧歎服慙謝去署新淦大旱徒步禱於蒙山刻期雨至遷南康同知累贈江西巡撫右僉都御史

徵獻錄參平湖程志

姚篚字希實以舉人授廣信府推官城玉山置戍分水温

陵等處弭礦徒山賊遷守宿州招撫流亡給牛種墾田四千頃贖鬻子女幾千人捐宿逋二萬五千立社倉備荒教民機杼資衣食累陞貴州僉事乞休卒贈太常寺

卿

吳志參平湖朱志

孫校字右文進士初授工部主事出督荆南關稅革羨餘轉兵部武選司郎中孤行己意忤嚴嵩謫廣東市舶司歷陞四川副使出淹繫撫豪酋興農講武平徭役暇則肩輿問風俗禮賢訓士以疾歸

馮汝弼字惟良以進士授行人遷工科給事中巡視光祿及盛甲厥劾巨璫張時等乾沒又劾冢宰汪鋐怙寵不

法鋹罷汝弼謫潛山縣丞轉知常熟縣築葉蕩等閘立法均田減耗數萬調餘千覈清倉粟備荒巡鹽役為盜捕按之如法遷知太倉州劇盜聚江海間前守不能詰設方畧禽之歲祲部使者出督逋稅既去置弗徵陞揚州府同知未之官以前逋稅論調遂乞休值倭警請督撫城平湖首輸為眾倡又築漢塘五十四里土石橋堰四十餘所歲葺之縣災賑米數百石瘞殍立義冢戚族貧不能婚喪者代舉之卒縣人請特祠祀累贈山東參政有補備遺錄紀建文時事祐山集十六卷

以上徵獻錄參平湖

程志

俞咨伯字禮卿以進士授工部營繕主事歷屯田郎中時貴戚武定侯郭勛專橫咨伯執法不少徇出知永州府歲饑請賑尤加意學校諸生邱有岳貧不能婚為捐俸娶婦卒登第遷河南副使提學山西

徵獻錄參吳志

王梅字時魁以進士改庶吉士除刑部主事建昌侯張延齡得罪下獄主事沈椿以貴戚不令入重獄及梅受事世廟聞之大怒先後主事二十二人皆下獄議杖梅謫

滁州判官梅能詩有柘河遺稿

馮祐山集參徵獻錄

趙伊字子衡漢子以進士授刑部主事蒞事精敏胥吏不得竄刀筆陞南兵部職方司郎中巡江指揮縛大盜至

具言夜所以格鬪被創後乃禽獲狀伊勞之退徐執盜
 訊乃知良民為賈者抗官兵之真盜已逸去矣召所居
 什伍相保者問之言皆合遂釋轉武選司時有要路故
 人夜持兩囊金以贈云得自某冀有所請伊斥之中山
 王後徐某以傳奉官錦衣法不得襲附巨璫曲得上旨
 伊爭不納乞還久之起車駕司置郵關符禁嚴貴臣皆
 痛嫉遂出為廣西按察副使乞終養歸再三召卒不起
 伊初刻意詩文後聞性命之說遂求見諸躬行不以論
 說為事著有序芳園稿子三邦秩字元敘以進士授海
 門知縣均賦減戍築呂四堤開鹽運河以勞卒官士民

禱祀邦程字元憲蘇州府訓導遷連城教諭邦泰字元
 美舉人任江西南安府推官多平反權關南贛溢額四
 千餘金佐公帑以母老乞歸邦秩子琮字伯裕舉人署

高陽教諭著葩經約說十卷

劉志參
徵獻錄

陸山字子周以貢選臨清州判遷知阜平縣以水患逋賦
 力請奏免調夏津入為光祿署正歸著孝經正義太極
 直解子萬源字天澄以鄉貢授光祿署正父病請以身
 代居喪廬墓周卹親族婚葬五舉鄉飲孫太柱字平治

太學生

徵獻錄參
平湖程志

陸炳字文明武進士祖墀以軍籍隸錦衣衛父松襲職遷

儀衛司典仗世宗繼統松以從龍累官後府都督僉事
松卒炳襲署指揮使護駕次衛輝行宮夜火炳入烈焰
負世宗出自是愛幸又以緝捕功累擢都督同知炳驟
貴仇鸞得寵陵嚴嵩上獨憚炳炳結其所親愛得鸞陰
私及鸞病亟炳盡發其不軌狀鸞憂懼死加少保兼太
子太傅尋劾中官李彬與其黨杜泰三人論斬籍其貲
加太保兼少傅掌錦衣如故炳頗結權要然周旋善類
亦無所吝帝數起大獄炳多所保全折節士大夫未嘗
構陷一人以故朝士多稱之者卒贈忠誠伯謚武惠襲
指揮僉事後言官追論奪爵尋錄其孫達仍錦衣千戶

世襲 明史本傳
參吳志

沈垣字子完以進士授大理寺評事歷寺正錄囚廣西出
冤濫甚多諸土司饋遺悉拒之長官固以請乃取一膠
槌懸之平樂公廨中粵人至今謂之懸槌館焉補惠州
知府事至立判錢穀出入上官不得撓其權獲和平劇
盜李鑑又條郡中利弊數十事上制府卒悉禹官舍祀
名宦子維鏡字西野諸生鸞產構書著有霏玉漫吟 徵
獻
錄參平
湖程志
孫植字斯立以進士授刑部主事中官潘珍從子怙勢為
奸利都指揮揚起昕乾沒慈慶諸宮費悉正其罪終養

歸起補兵部歷光祿少卿祠官祝釐費多不經植爲簿
正歲省大官數十萬巨璫耿清目之爲鐵人尋擢右僉
都御史出督河道時三殿工興漕渠久旱大木漕艘不
前河流且北徙衆議歲增淺夫植以民疲已極力止之
轉刑部侍郎值邊警京師敕守崇文門時孫某守外城
以調兵不至劾本兵楊博植知博素習邊事止其疏而
亟遣騎趨發兵轉右都御史訊巨闖王采邢保張進朝
等盡法不少貸三乞休不許魏國公徐鵬舉無適子幼
子邦甯詭稱其母鄭爲繼適請封復賄助教鄭如瑾萬
金謀奪爵事下南法司植謂當嗣庶長魏國溺愛宜罰
鄭氏詭封追奪如瑾削籍時高拱再起修隙遷怒於植
給事中王楨遂希拱意誣劾以訊報不詳奪職未幾起
工部尚書辭不赴卒賜祭葬贈太子太保諡簡肅子成
泰見下

陳善道字敬夫以舉人知德安縣繕城備流寇諸豪惡爲
奸者悉以法繩之通判廬州掌錢穀出納羨餘悉以歸
庫轉松江同知乞休布衣蔬食如故孫泰來見下

陸杲字元晉以進士授刑部主事出爲漕運理刑與漕臣
忤會漕臣罷亦去官陸氏自唐宣公後爲巨族杲倡族
置田八百畝屬景賢祠歲收其入以周族人曰族田又

置田五十畝屬世德祠昇宗子供祭祀曰祭田設塾集里族子弟置田二百畝以給稍廩曰學田宗族日繁更徭不支置田三百畝分贍之曰役田嘉靖中島夷內寇捐貲佐築城一縣賴之累贈刑部尚書子光祖光祚見下光宅見孝義

以上浙江通志參徵獻錄

姜學夔字一臣以進士授龍泉知縣調平谷多惠政召入為御史忤劉瑾謫南都察院經歷出為湖廣兵備僉事瑾中以他事罰米百石遂乞休屬吏贈遺無所受歸設義塾講明知行合一之理置義田以賑鄉黨宗族稱其賢

徵獻錄參姜氏族譜

曹禾字世嘉父渭以掾為驛丞禾以進士知鄱陽縣入為工科給事中奏請蠲浙直被倭郡縣田租從之進工科都給事中尋坐累外謫遷松江府推官歷知韶州府孫

徵庸別見 徵獻錄

俞乾字一清幼稱神童性至孝居喪廬墓三年以進士授刑部主事勢豪犯重辟者夤緣中貴入賄請拒之嚴嵩傾夏言論死乾適監刑西市憤鬱仆地移時始甦遂乞歸眾憐其貧贖之悉不受楊繼盛贈以詩抵家二日卒

浙江通志參吳志

陸光祖字與繩年十七與父杲同舉於鄉以進士知濬縣

秋潦傷稼撫臣以非時不報光祖力爭得蠲租縣大俠多通盜光祖悉錄爲義兵度其魁李以平必畔將入覲授計縣尉已果肆掠遂擒之有富民誣陷重辟相沿數十年以其富莫肯爲之白光祖察其枉立出之又清內鄉王佔田還民封邱王私販下其奴於獄行取入都緹帥炳於光祖爲宗人欲引居言路辭引爲吏部復辭補禮部祠祭司主事改吏部文選守法不徇忤中貴爭毀之落職起祠祭郎轉儀制守陵中人張方進甘露知縣吳府上方藥皆抑不進內閣徐階以嚴訥爲吏部遷光祖驗封郎中改文選擢海瑞爲言官登進者碩幾盡又

破格擢王化等九人御史孫丕揚劾光祖專擅翌日遇丕揚於朝揖之曰公所論極荷相成但黜陟不由獨斷引嫌徇私何所底止丕揚沉思謝曰吾過矣卽日自劾光祖卒削籍揚一清還吏部起南太僕少卿晉南大理寺正卿外艱服闋以故官起陞工部侍郎病歸旋起南兵部侍郎改吏部初與內閣張居正善及居正柄用自恣乃乞歸再起南刑部尙書改吏部論巨璫張鯨不法狀又舉許孚遠顧憲成等二十二人以風吏治旣以推用饒伸萬國欽忤旨乞休不許會推閣臣廷臣首光祖名詔報曰卿向有疏復會推舊制今卿果居首光祖方

懷去志尋乞歸卒贈太子太保諡莊簡光祖少有大志
 嘗書以天下為己任於座右接人一以至公無藏怒宿
 怨卒之夕海上星隕如斗擊地有聲子基忠字伯貞以
 廕授兵部司務遷刑部郎中治指揮鄭光耀獄妖書事
 起中禍於禮部郭正域人皆引避基忠獨周旋狴犴間
 基恕字澹園以廕任工部郎中基志字季高詹事府主
 簿創惠宗祠益置田贍族明史參徵獻錄李詩繫案徵獻錄光祖以薦饒伸萬國欽許旨乞歸而史於此事則云乞休不許後因薦王時槐王樵等給事中喬允劾之乃力求去此當以史為正其他與史小異及史所不載者悉采入備攷

韓弼字汝良以進士知豐城縣陞南昌知府值景藩就國

以羨餘供應民得不擾袁州散平子餘人懷異圖詭稱
 投充入伍弼力排羣議卻之萍鄉流賊剽掠近境夜銜
 枚躡之就禽轉布政使參政罷歸子子祁見下分省人物考參

曹光字原實以進士授中書舍人遷福建道御史嚴嵩柄

國光以諫開馬市廷杖謫湖廣都事陞南禮部郎中歷
 福建運使所至以清惠著歸杜門著書人罕得見子繹

祖見孝義吳志參平湖朱志

陸光祚字與培光祖弟以進士授兵部主事中貴戚晚奴
 隸竄籍者盡汰去邊烽起輒匹馬馳矢石中籌畫尋補

禮部歷三司隆慶間三疏請皇太子出閣講讀詔取光祿銀十萬抗疏止之慮宗祿不支請限服制開生業嚴法禁又以謚法錫典過濫奏爲條例肅懷王無後族人越序乞嗣固爭不與南陵王絕周王覬獲遺貲疏請補宗室祿忤柄臣出爲湖廣副使督學陝西光祿爲人亮直篤厚所生母卒故事無去官持服者光祿以請不俟報可而行事兄如父買妾知爲故家女厚遺遣還有淹

庵遺稿

劉志參徵獻錄

陳九疇字天錫以舉人署昌平州學正遷知平鄉縣值水災賑濟有方移保定府通判有清名轉知上石地多土

司撫勦互用帖然感服以老乞歸

馮敏功字元卿以禮部郎參議江西弭南豐兵變陞徐州副使河決睢甯數百里敏功晝夜并作工且就風雨彌旬水復齧邳州城解衣囊沙捍之吏民感激爭効力所治築凡二百八十里遷山東參政抗議泐口膠河不可開忤柄臣自引歸起督漕于淮邵伯寶應高郵三湖相連爲巨浸漕舟每患漂沒因議濬內河運之敏功晝督濬夜閱訊牒又馳督漕舟自徐濟七晝夜昏絕已稍蘇復出治事病革叩家事張目不答適同事羅某至謂曰內河於國計甚利但逼於湖湖善潰堤薄必別築護堤

不卽數百里魚鼈矣命子伯禮曰吾死有賻歸之官以

佐堤乃暝敏功性孝友父嘗卒邁盜冒鋒刃出之愛弟

敏効甚篤敦恤里閭鄉人祠之贈太僕卿以上徵錄

俞南金字國良以進士授刑部主事出張仁沈清伯于獄

守常德水災捐俸瘞骸固築隄防民以全活榮藩欲廣

莊田遺千金不受稔知饒明德冤忤權貴出之再守馬

湖搖夷叛單車諭降調思南府致仕孫喬桂字元芳進

士知潛山縣出沉獄除巨猾捐俸建石梁創義冢以病

歸徵錄參平湖朱志

張大忠字國禎以進士授刑部主事守廬州除合肥巨奸

勦平英霍山寇歲早出粟賑濟遷陝西副使屢遷本省

布政司藩邸多踰制奪民間女爲妾釐禁之改雲南乞

養歸從兄大雅字心宇舉人授海門知縣著有易卦緯

論四書衍義徵錄

陸萬鐘字天與諸生好孫吳兵法會倭入寇萬鐘出禦多

禽獲倭攻桐鄉設方畧卻之事聞授泰安州判歷陞潞

安州同知平湖程志

馬千乘字國良兒時母疾禱天請以身代以進士知分宜

縣陞南兵部主事歷廣東僉事會兵討平羅隲山盜賜

金幣陞四川參議乞歸十餘年起湖廣參政廣東按察

使黎叛入海諭降皆曰此昔平羅隲使君也羅拜乞降

海南曠地數萬畝墾為田賦額以紓廉州珠禁甚峻劉

直指欲弛予民千乘曰民難與賊爭利而賦累無已力

持不可歸不復出

浙江通志
參徵獻錄

陸萬垓字天溥以進士授福甯知州有倭寇當事議增賦

力為節縮歲省金六千有奇歷刑部員外郎中守梧州

招撫叛夷數萬置東安西甯二縣會滇緬大訶遷雲南

兵巡副使躬冒矢石下隴川禽岳罕收反卒尋以僉都

御史巡撫江西去煩苛絕餽遺築圩千頃創社倉法兩

值大禱全活無算母老五乞歸不得聞訃以哀死贈右

副都御史著知非小鑑十卷

徵獻錄參福建
廣西江西通志

孫從龍字化光以進士授行人轉刑部郎中以慎刑稱陞

九江道乞歸杜門課子蔬食布袍終身不厭

吳志

陸志孝字仁卿以進士授廬州推官入為刑部主事乞南

改吏部歷郎中丁憂起復入為刑部主事出知九江府

補衡州歷高州調延平府歸著有寓黃集

袁志參
徵獻錄

楊府字見山舉人任滄州知州移甯州有惠政後里居力

助築城禦倭析縣後利弊因革均資經畫著有經書講

言醫學搜精

吳志

倪壯猷字華芳以舉人授宜興教諭陞江浦知縣請復置

東葛驛以甦役困江行多患飄沒開新河五十里涉者
 便之陞南刑部主事歷貴州僉事紅苗反上勦撫機宜
 築思南鎮遠諸城添設平頭印江兩營守備兵尋禽苗
 首上救銅八議陞雲南兵備副使黔國莊田私徵為民
 害請下郡縣代徵著為令置養馬指揮秦乙清于法黔
 國不敢撓討隴川都安民禽營虎狸揚阿者所在祠祀
 有救浦救銅平隴合集徵獻錄參袁志

洪丞字惟進以進士知陳州嘗輯治畧三十八事奏停解

京俵馬三百餘匹又議減河北歲派驛費治稱最終吏
 部郎中有來鶴軒稿徵獻錄參平湖朱志

李爓諸生好任卹排解所至輒殖千金隨手散去由貢官

潁州州判以廉能調滁州河工告績乞歸會知縣劉士

瑗丈田人莫敢議爓與抗論士瑗怒爓不為動卒從之

平湖朱志

韓子祁字心堯以舉人為贛州府推官教民植木棉習紡

織上官以意入人罪子祁不從左遷蘇州通判移道州

知州有醯雞集徵獻錄參橋李詩繫

孫成泰字允交以進士知道州州市販者例輸稅干官革

之陞蘇州同知興水利督楊林奚浦諸役入為刑部員

外尋出知邵武府首崇文教歲饑先賑後請全活甚眾

以忤上官乞歸起知大名府府有公田俱守令以下支給成泰捐之學宮擢分巡道副使復以忤撫臣歸

平湖程志

參福建通志

馬應圖字心易以進士授行人陞禮部郎中以疏救趙用賢劾科道孫愈賢齊世臣等朋比阿徇妨賢者路并及首輔上怒降大同典史移知封邱縣尋復刑部主事引疾歸應圖在官廉潔不苟取一介居家日釜炊常不給嘗爲鄰人白當事直其訟贈以米受之旣而見有金置米中并其米還之事繼母孝聘妻有癩疾或勸別娶不聽後贈光祿少卿

平湖程志參分省人物考

陳泰來字伯符以進士授順天教授進國子博士執政與言路相水火上書規之坐是五年不調郎中馬應圖上疏譏切執政又力詆給事中齊世臣等忤旨謫典史給事中王致祥等希執政意復連章劾應圖且言疏奏出泰來手應圖旣貶不問泰來引疾歸起禮部主事進員外疏請建儲不報會大學士王錫爵赴闕旋有詔暫虛儲位並封三王泰來上疏力爭且面折錫爵于朝旁觀悚慄卒寢封議尋以疏救趙南星謫饒平典史卒後三十六年追理建言國本諸臣贈光祿少卿著有員嶠集

明史于孔兼傳參橋李詩繫

馬維銘字新甫以進士知南直隸太平縣攤畝稅以輕正額又請豁黃山虛糧入爲兵部職方司主事督山海關別諸冒濫上之著爲令有史纂屨提編

徵獻錄

陸長庚字元白以進士知廣德州核汰田賦浮額又奏免緞價及煤山採貢課農桑濬渠建倉繕學宮置田以給諸生之貧者陞刑部員外郎勘巨璫邢尙智獄分巡下湖南道調廣西桂平道猺首韋扶仲出沒荔浦大殺掠時用兵三萬五千費餉十三萬長庚請留兵三千守荔浦城餘盡撤去賊懈長庚密遣副使童元震夜至白馬冲襲獲其妻女扶仲出追佯卻又追墮伏中力戰脫去

則荔浦兵已扼其歸路遂禽之播酋楊應龍反遷湖廣按察使提兵扼水陸應龍平遷江西左布政使請捐南昌府門稅改折京絹又以大水請弛長河魚禁甦民困值宗祿不給宗屬千餘人噪於衢長庚出存積羨金二十五萬補之陞應天府尹司庫進羨累萬卻之移貯藩庫判還徐鼎彝被奪蘆洲二萬畝豪強屏息遷南通政請禁私鑄忤時貴乞還所至祠祝卒賜祭葬著有陰符經參同契疏體仁編子啟鏐字開雍諸生孫濬睿別見

徵獻錄參江南江西通志

戈用泰字來陽以進士知涑水縣稅重民困歲又饑悉心

撫字會有採礦之役以身扞民罔所避忌入為南刑部

郎中乞休終養著有適適軒集

浙江通志參分省人物考徵獻錄

陳九韶字宗舜以進士任刑部主事出知廣信府會中人

潘相開礦擾民繪圖陳疏得寢民立祠祀終湖廣參政

徵獻錄

馬明瑞字道楨父汝賢舉人有印湖集明瑞以舉人就上

虞縣教諭遷景州知州有惠政以艱歸起補德州築堤

防備預荒政陞工部員外廣甯失守督造軍器有勞論

罷歸從子啟賢諸生

平湖朱志

陸錫恩字伯承以進士知萬安縣時礦稅起有以回青石

膏利啖中人者錫恩械之以計令黠者發土皆砂礫遂

罷縣設戍備賊守弁牟削眾譁縛弁錫恩單騎馳問狀

下弁于獄杖倡亂者一軍帖然陞刑部主事尋乞歸卒

贈刑部員外有雙鳧草傳書堂集子澄原別見

平湖程志參朱

志

馮伯原字起寰以拔貢授上林苑丞陞鬱林知州有惠政

忤當道歸

吳志

施時垚字念同少極貧有志節以舉人就太倉州學正陞

儀真知縣鹽販為奸盜鋤其魁閭里肅清擢武昌府同

知力辭歸

平湖朱志

金汝礪字啟心以進士知福安縣有清節遷南工部主事
 出督龍江關稅還理屯務裁板坊脚價數千金中人怒
 之不為動江南水潦淮東亢旱條上救荒事宜因著荒
 政錄出知真定府罷歸汝礪性至孝父疾禱于天乞以
 身代以母慈居官不施鞭扑

徵獻錄

趙維寰字無聲以舉人署海甯教諭陞南國子監丞與上
 官不相得欲挂冠去上官謝之乃解擢刑部主事疏劾
 撫甯侯朱國弼不法轉郎中與刑部尚書甄淑訐奏坐
 是奪職杜門著書以終維寰宋宗室與詔後曾祖彰諸
 生有隱德嘗入太學吏部某故與彰善欲為延譽謂可

即得官彰謝之不試而歸

平湖朱志

金汝諧字啟宸以進士知婺源縣擢御史章數十上不顧
 忌諱援劉光復劉文炳參吳道南李三才及織造御馬
 諸監尤人所不敢言著有理學訓歷代名宦芳躅

徵獻錄參

吳志

過庭訓字爾韜以進士知江陵縣勘楚藩佔淤田數萬畝
 歸諸民遇大政疑獄集紳士詢之或親造其門陞雲南
 道御史管理屯田福王以備邊子粒改作莊田抗疏爭
 之出清馬牧劾橫瑞邢洪高案等因疏請撤稅監又請
 起廢如鄒元標趙南星等出賑山東招流民廣粥廠弭

饑民亂又請截留漕米四十萬石備賑挺擊事起疏請
 篤慈孝以釋亂萌又以廷臣持門戶相攻極陳其弊畧
 曰諸臣章奏是非公私一檢發可立辦惟因一概留中
 混無區別醞釀至此連疏不報丁憂起尋引疾歸後陞
 順天府丞未任卒庭訓講濂洛之學南都從祀程子祠
 著有聖學嫡派性理翼明分省人物考

徵獻錄參
湖廣通志

劉廷元字方瀛以進士知南海縣縣濱海田少賦繁請覈
 實以蘇民因擢陝西道御史疏請東宮講學遣福王之
 國并劾福府莊田踰額非制又劾盧受高竊等不法狀
 歷兵部尚書從弟文元貢生任袁州府通判

平湖
朱志

姚士慎字岱芝以進士入翰林改吏科給事中疏諫開礦
 忤旨謫福州府經歷尋調順天府丞進左通政魏忠賢
 擅權謝病歸崇禎初起大理寺少卿論救給事中惠世
 揚出獄奉敕推勘奸黨以六案定罪遷南太常卿疏陳
 宏聖學校邊才培元氣凡五事上嘉納之晉南刑部尚

書致仕卒子蔭賜祭

徵獻錄參
平湖朱志

胡士相字端甫以進士知弋陽縣陳利病十事陞刑部主
 事丁憂起補工部治張秋河道清復水櫃疏源滌流爲
 治河功最白蓮賊起嚴城守禽其渠魁守湖西寢奸民
 開礦止衆建魏忠賢祠請蠲袁州積逋建義倉興學校

陸廣西按察丁母憂歸卒 徵獻錄參 江西志

施鳳來字羽王先世徙自湖州父應墳見孝義鳳來由編

修起南司業累陞禮部侍郎晉中極大學士乞歸賜銀

幣廕一子尚寶丞子日升字叔允以廕補內閣中書冊

封長沙王卻贈金有使楚吟燕河漫錄等集孫鉉字公

遠以貢任義烏訓導補平陽乞養歸 平湖 朱志

陸鍵字實甫萬垓子以進士授建昌府推官署南城縣事

均糧役卹馬牧清理漕運議置盱江書院于南昌集旁

近三郡諸生肄業給田養之行取俟命輯累朝名臣奏

牘尋卒著有尚書四書傳翼 徵獻錄參 江西志

徐調元字相之以進士知南陵縣值大水度地勢築圩壩

歲饑捐俸施粥全活萬計乞改紹興府教授入為國子

監博士歷刑部郎中知廣信府道卒 徵獻錄參 平湖朱志

馬德灃字澹真以進士就甯國府教授陞刑部郎中挺擊

事起與王之案議合作旨慈慶宮引見御史劉光復以

陞呼觸上怒欲置重辟德灃據律改奏對失序宜薄譴

復忤旨降山東鹽運司運判道卒子嘉柱詣闕訟父冤

得贈太常寺少卿嘉柱廕授光祿嘉柱字擎臣歷刑部

員外疏糾御史踰冬至日刑孫紹曾見下 徵獻錄

曹孔榮字豫仁父大有諸生孔榮以貢知天長縣會游饑

竭力賑濟立輪穀墾田諸法月朔望進諸生講學丁憂

起補雞澤縣革俗訐訟縣無志創修之平湖程志

劉希夔字虞章以貢授連江知縣調齊東招輯流亡給牛

種勸耕平湖朱志

周翼明字季醅乍浦所軍舍以武進士授昌國把總賈舶

失途至同事欲誣以盜翼明持不可遂被讒歸歸二年

起署金盤歷臨觀倭犯温州翼明入大洋抵莫山逐之

討建州領浙兵為都督劉綎先鋒由寬甸深入破牛毛

馬家深河古火狐狸十五寨至橫壤兵潰戰死賜祭葬

贈都督僉事建慰忠祠蔭乍浦所百戶世襲明史劉綎傳參徵獻

錄

康承爵字德徵以軍舍寄學中武進士授衛鎮撫歷神機

營遊擊清勾羽林軍籍勳戚不敢妄干時魏璫用事力

求外補出守廣東破惠州山寇葉文林海寇劉香等調

廣西參將又平龍山賊胡扶記崇禎初分守台金嚴副

總兵破海寇張宏銘于大陳山又破之于韭山加都督

僉事改分守貴州等處未至國破微服歸乙西南都陷

七月二十三日承爵於平湖西門外死之徵獻錄參袁志

案海甯衛志康泳本嵩縣人洪武四年以從征功補乍浦所百戶泳卒子弼嗣弼卒子甯嗣甯卒子輔嗣輔卒子綬嗣綬有勇畧嘉靖十三年倭攻乍浦至砂腰戰于白馬廟陣歿子汝暘汝昇以綬死事並襲承爵為綬孫

九山志作
綬曾孫誤

沈萃楨字君聚與弟杞楨同舉于鄉萃楨以進士授工部主事出督荊州關稅盡革諸小稅名目以羨金築堤禦水歷兵部郎中出守蘇州舊派福府白糧詔令協濟五年七運未已竟革不供歲祲饑民肆掠杖斃首事三人乃止陞福建副使紅夷入寇身冒矢石出奇兵撓之五越月就降轉本省參政以親老乞歸為御史曹欽程劾罷初欽程令吳江賊私狼藉萃楨按之如法至是附璫東勢報復給事中張國維白其事起湖廣參政不赴再補福建按察使時海盜叵測撫臣屢經諭降首鼠觀望聞

萃楨至乃相率降尋陞湖廣右布政使歸卒子日昆字

以白舉人日晃字以大諸生孫嶙太學生浙江通志
參徵獻錄

馬鳴霆字國聲以進士知閩縣字民如子因杖輔臣葉向

高家奴坐累改紹興府教授尋知邵武府調河南副使

治河有成績闖賊圍信陽鳴霆治火器拒守賊退遷山

東參政擢陞尚寶司正卿乞歸袁志

陸懋功字紀常以舉人授南工部主事出知保甯府是時

獻賊已熾州縣多被陷懋功繕治城守增設梁山關敵

臺有捍禦功以杖殺悍卒觸撫臣怒罷歸

毛湛字修之應銓予以舉人就婺源教諭介然自守陞南

京監丞歷刑部郎中奏獄平允邸舍蕭然若寒士卒官

以上徵
獻錄

陸府修字採禹以舉人教諭諸暨創修學宮擢松江府通判署府事剔除漕弊禁革耗羨陳繼儒為撰碑記著有

詩文集芻蕘志吳志

陸之祺字筠修以進士授工部主事視學江西拔黎元寬

羅萬藻楊廷麟陳際泰等晉福建按察使入覲陳禦寇

方畧甚悉轉河南道塞荆隆決口著河道備考引疾歸

起補陝西左布政轉山西布政以父瑞銓年老乞養歸

里居四十年周卹族黨無德色有滋樹軒集平湖朱志

陸懷玉字石含以進士授工部主事晉郎中董三殿工竣

例擢京秩因不謁魏忠賢出守鎮江廉靜嚴明郡大治

轉鹽法參政商民戴德建祠尸祝陞山東按察使出死

罪數十人尋擢福建右布政謝病歸子祚蕃見下平湖朱志

陸從諭字耳宣幼即研究性理之學以進士授國子監博

士歷工部郎中無子卒貧幾無以殮弟從誥字具評舉

人學業醱至為人師法平湖程志參
平湖朱志

徐在中字楚石以進士歷任工部郎中忤巨璫革職崇禎

初以原官起出知廣州府治通番首犯不貨犯為朝貴

私人銜之中以他事置之法子錦貢生贈靈川知縣孫

吳治舉人官大理府同知吳志

沈君楨字用缶以舉人署瑞安教諭捐俸新文廟海寇劉

香之亂畫策上巡石某用其言平之遷知奉新縣以法

繩宗室觀察使吳某欲籍故都御史帥某家產充餉君

楨以帥名御史無子為其家人誣誤力爭得免調德安

革郵傳供應罷歸徵獻錄參袁志

孫裔蕃字臨鵠以進士授工部主事出督蕪湖鈔關會璫

餽張甚關差例有餽不與通幾被譴告歸商民像祀之

崇禎初薦起兩淮運使不赴袁志

薛振猷字爾嘉以進士授撫州推官治獄明敏他郡有不

能理者御史輒委之父喪歸以毀卒撫民立祠祀之弟

仲猷字爾順諸生里中稱長者徵獻錄

沈樟字元美少穎悟絕倫弱冠補諸生試輒高等屢困鄉

試入太學選蘇州經歷不赴歸結茅數椽日事吟咏喜

長嘯竹下自號竹隱平湖程志

陸鏊字味道以進士授刑部主事尋出守肇慶府清市舶

抑豪強陞副使佐制府破海寇劉香連猺叛鏊攝巡南

韶密移師搗其巢猺懼乞降歷湖廣按察使乞終養歸

後流寇四起有建議于夏鎮添設巡撫以鏊為之會病

不起著有寶綸堂集吳志

陸澄原字嗣端以進士授工部主事崇禎改元魏忠賢焰
 猶熾奏疏皆稱厥臣澄原首斥其名劾之兼糾兵部尙
 書崔呈秀奪情降旨薄責于是廷臣相踵彈射轉員外
 遷大理寺副疏參袁崇煥莊烈帝嘉其敢言降密旨令
 再奏遷兵部職方員外提調武試騎射不中式例閒住
 忌者中以考工法落職甲申南臺建弟濬原爲澄原訟
 寃下獄後論者直之乃出濬原字嗣哲季弟深原字嗣
 長並諸生國破不復出

徵獻錄 案郡縣舊志皆云思宗登極澄原首劾魏忠賢徵獻錄則云疏參戶部尙書崔呈秀奪情考澄原應詔陳言一疏實崔魏並劾今正之

陸錫明字幼輿以進士授工部主事出知常州府丁憂起

補徽州時璫勢羅織民苦重役思爲亂錫明盡心力撫
 定之遷提督江西學政副使以母老乞歸錫明少穎異
 父基原手授經史訓以忠孝大節廷對時或諷令謁魏
 忠賢正色謝之杭州孤山有遠祖宣公祠豪右改爲書
 院錫明與兄鏊從子澄原合疏請復

徵獻錄參平湖宋志

郭紹儀字汾仲孝子球孫天啟乙丑登進士廷對日魏璫
 私人賣珠者諷令一謁可得狀頭笑卻之授當塗知縣
 行取湖廣道御史時緹騎四出繹騷上疏極論禍幾不
 測巡視屯田上條議十二則格不行乞歸著有康濟譜
 三續養生論

徵獻錄參 柘上遺詩

楊六府字浩生崇禎時福建布政使陸懷玉以賢良薦授
陵水知縣勸農重學黎人吳春盤據大坡挾居民為亂
設方畧禽獲巡撫又特疏薦以真儒目之尋病乞歸後

入名宦祠

平湖
王志

屠象美字幼繩以進士授行人對策稱旨改翰林院檢討
東宮講讀疏薦倪元璐李邦華等三十七人尋罷歸乙
酉五月糾眾守郡城城破為亂兵所害

微獻
錄

馬鳴雷字國威靖江訓導值亂歸乙酉七月命家人悉避

去城陷獨坐於堂遇害

橋李
詩繫

陸又機字衡如以貢知日照縣民貧竭力撫字有徭役則

計畝均出富豪毋得免乞歸父老遮道皆涕泣著有尚

書集解龍溪龍湖語錄子上瀾別見

平湖
朱志

秦宏忠字恕先以貢授紹興府訓導遷知通道縣苗獠偵

富室新壟發棺攫其首要贖宏忠嚴禁人贖患遂絕山

僻士貧每試鄰縣以賂竄籍宏忠在事人不敢干以私

苗稅十年一徵縣令統兵往苗苦擾宏忠攜一僕開誠

勸諭苗皆感激旬日而畢歸卒于道

微獻
錄

陸燦字振玉崇禎甲戌進士授濟南府推官釋殊死重囚

七人輕罪數十人監生宋玉鋈兄弟坐盜久繫屢叩登

聞不得白燦廉知真盜在厥獄請覆鞫釋之戊寅十二

月

大兵破居庸關南下山東大震巡撫顏繼祖卒師次德州城中兵已調發過半文臣相與嬰城固守明年正月城陷燦死之妻孫氏妾王氏及子凡同死者三十七人

國朝乾隆四十一年追謚節愍

平湖朱志參鈍翁類稿勝朝殉節諸臣錄

陸清原字嗣白光祚曾孫以進士授增城知縣鄰縣山險多盜清原先揭示禍福一日單騎抵賊巢賊震懾請命按籍散遣壬午召對陳時政十事上嘉納之擢雲南道御史浙江白糧北運累民疏請官解報可又條上安攘七議出按福建道經淮安疏言史可法兵單根本重地

恐不支請援師悉留淮上聽可法調用不報巡按福建行部至漳漳故多山寇清原廉得奸細在城者絕其內應募壯士七百人從間道破之禽其渠魁甲申燕京不守清原捐貲備甲仗募兵三千請身討賊疏再上為馬士英所格乙酉復命中途聞金陵陷慟曰某不獲從倪范諸臣殉先帝者以奉簡書在外也今已矣天下事無可為清原故閩吏當還求死所耳乃間道入閩從唐王授都御史上疏言閩越唇齒宜亟餉越即命清原度嶺犒師遇馬士英面責之士英怒遣部將趙體元進見猝起拔刀斫清原墮三指幽禁舟中

大兵渡錢塘士英先一日遁兵潰營弁沈起龍毛有僭強清
原起清原曰越亡閩必不守去將安之遂赴江死年四
十有二

國朝乾隆四十一年追謚忠節子若禾字元祚諸生痛哭覓

父遺骸哀慟動行路

明史綱目三編參
徵獻錄平湖朱志

陸士鉉字古雪八歲能詩性至孝母喪水漿不入口以歲
貢生授訓導甲申間變大慟絕粒死我

國朝乾隆四十一年入忠義祠

勝朝殉節
諸臣錄

馬嘉植字培原進士授武進知縣縣賦繁重糧長害尤劇
議變為圖收任輕而役均漕兌軍丁多耗外邀索痛抑

之至露刃鼓噪不為動陞吏科給事中尋督江西福建

餉馬士英嫉其亢直外補廣東道即謝事歸葺園于湖

湄曰東臯後祝髮村居自號鐵雪道人苦節十數年卒

子輝曾字學山有三湘燕趙遊艸

江南通志參
橋李詩繫

倪長牙字伯屏崇禎丙子鄉試第一旋第進士授蘇州推

官抑豪強鋤奸猾與太守陳淇謚恩威互濟士民立雙

清書院祀之署嘉定知縣有惠政民為建報德祠轉兵

部主事甲申落職後補武選司主事乞休乙酉聚土兵

為守禦計未幾縣城破乃薙髮為僧入奉化山中

江南通志

參徵
獻錄

金和字燮之進士父德普福建通判和初授溧陽知縣漕

兌有遼米練米襄米諸名倡為合兌法民便之調山陽

縣多水患舊例修河費解京口遇河決詳支多濡滯和

請添設山清廳同知專司出納乃得隨決築

平湖朱志

錢士馨字穉農貢生少讀書化城庵研究經史遇異義輒

錄於冊崇禎壬午遊南雍尋入燕公卿爭延為上客士

馨厭薄之人目為狂生賊犯京師中允李明睿密請南

遷士馨語之曰賊盡得關陝晝夜行四五百里若繞出

畿南以抗警蹕公將何辭以謝天下又曰不如死守以

待勤王之兵而遣太子南行以繫人望李難之京城陷

士馨匿跡樵採已復往來河朔間交其豪傑曾偕五人

走慶陽薄暮五虎躍出土馨曰不盡殺何以見諸君勇

乃人發一矢當者立斃一少年中虎額八尺許虎入林

莽中追割其舌以還投旅店呼酒晏樂舉杯屬少年曰

發矢不中要害請受罰後奔走無所成以死生平工古

文詞兼精書畫著有古文易周禮說周禮答疑冬官補

亡儀禮說禮記申惑王制月令緇衣中庸等說春秋志

禮續越絕書

浙江通志參
橋李詩繫

沈中柱字石臣口吃不能言熟于左國史漢為文縱橫闔

闕數千言立就以進士授江西吉水縣知縣時大江左

右歲禮中柱請減租蠲稅格不行復鄒元標所創書院
黃道周以言事下獄力救之罷歸明亡為僧名行燃號
無淨構懷木庵奉父隱其中著有懷木庵稿問道錄弟
中琛字獻臣從劉宗周黃道周遊有抱一軒稿

平湖張志參明

詩綜

國朝

陸澹睿字以愚明兵部侍郎長庚孫以舉人授宣府推官
出死囚三人按悍弁徐洪志擅斃平民罪忤撫軍投劾
歸以子棻累 贈內閣學士兼禮部侍郎子世楷棻並

見下

平湖朱志

施洪烈字仲芳以貢授欽州知州時粵疆未定流寓五羊
城授徒不給以詩見重藩邸一日張宴羣吏紛集王曰
今日非宴下吏宴詩人施欽州也署程鄉除里長供應
費修復七賢書院既抵欽招輯流亡榜軍中所掠子女
姓氏於衢俾眷屬領歸壤接交趾山海寇交訌綏輯帖
然尋陞松江府同知守正不阿忤上官罷歸有粵遊觀
海天中諸集洪烈少時嘗鬻田數十畝贖故友妻子還
里父傑子大義並有長者目

平湖朱志參
樵李詩繫

陸世楷字英一長庚曾孫以拔貢授平陽府通判姜瓖亂
圍平陽固守百日旋誘降其魁釋其黨大饑人相食為

粥濟之遷登州同知海寇猝至設守具督舟師逐退之
 有嫠婦夜被盜殺鄰里坐其子婦有所私致殺姑察其
 冤禱于神卒得殺人者陞南雄知府時百粵初平平南
 靖南兩藩王並駐廣州羽檄屬道部將一日箠死七人
 世楷馳見帥正其罪平藩侍衛入山發民鑿礦世楷往
 詰曰王役民不使太守知詐也縛送王王不敢問有僧
 倚藩勢為虐杖斃之以艱歸送者遮道立祠祀起補思
 州大旱斗米二千錢停徵稅民感輸者過半病乞歸著
 有越吟晉吟齊吟種玉亭詞踞勝臺詞思州府志子奎

動見下

浙江通志參
曝書亭集

馬紹曾字覲揚明太常少卿德豐孫以進士授翰林院編
 修主考江南徐元文汪琬秦松齡莫大勳等皆出其門
 轉山西岢嵐道副使陞福建督糧道參政時閩方用兵
 徵調如織兼攝水陸驛傳鹽法諸司總督李率泰以為
 能擢河南按察使累陞都察院右副都御史晉戶部右
 侍郎 平湖
朱志
 鄭龍光字兩為 廣東名宦
冊作韜生 以進士守南雄嘗履畝省荒過
 五羊嶺有虎負嶠眾莫敢進龍光曰昔劉昆為治虎北
 渡河是虎獨不知太守以勸農至哉驅之虎遁去以二
 僕隨客投謁無所拒然清峻莫敢干以私盜踞黃石寨

嘉興府志 卷五十八
肆掠會兵勦之劾逐墨吏十數員擢西甯副使

浙江通志參平

湖朱志

倪籥元字府一以進士知蘄水縣捐俸代償積逋不善事

上官尋罷歸從兄聖生杭州府教授有金某繆某受李

自成偽職三學諸生憤遂訴之當事命察三學人姓名

聖生不報挂冠歸

平湖朱志

陸光旭字鶴田以進士授保定知縣值大水光旭築堤捍

之民呼陸公堤歲饑捐俸賑濟署中食或不給擢陝西

道御史奏請免霸州文安保定三州縣荒地錢糧畧曰

自順治十年間渾河南注從霸州城根達東洵渾波所

過三處之地皆成水府臣初任保定縣嘗艤舟從保定

至霸州見浩漭無涯荻蒲連渚三州縣困苦窮民每環

聚而泣訴曰此卽在昔桑麻衣食之猷畝也此卽於今

歲徵季納之錢糧也此卽十年來賣妻鬻子賠累無窮

之谿壑也臣目擊其狀不爲呼籲請命非所以仰承

皇上軫恤熒黎至意時議罷巡方光旭復上疏言臣計今大小

諸臣內之所不便者惟言官外之所不便者惟巡方有

言官而大奸大惡得以上聞有巡方而污吏貪官不時

參處而諸臣必欲去之當必有故如以人不肖也則

當去其人何以去其官如以法有未善也則當更其法

何以廢其事奏入

章皇帝優容之尋遷分守冀南道獄無冤繫聞保定水復決遣

使齎金給窮民保人立祠祀之乞養歸起補江安糧儲

道著有屈亭遺稿 畿輔通志參 平湖朱志

沈棻字子佩以進士授西平知縣歲大歉民多流亡棻設

法招徠給牛種諭以歲豐取償免其息墾荒地數百頃

又許以布粟代稅卽束麻擔草亦計值納之歲募河夫

多逋逃乃按貧戶之逋稅者充役民喜得食且以工價

完逋率爭先赴工以勞瘁卒官士民建祠祀之著有柏

亭稿西平縣志子季友見文苑 平湖朱志參 構李詩繫

楊萬基字御青以貢任縉雲訓導釐定孔子廟廡祭品復

朱子祠田署雲和教諭整飭士習卒官 平湖 張志

陸標錫一名元字叔因性寬和生平未嘗有疾言遽色與

人交坦直無城府見義勇為族女有蒙難者斂貲贖之

順治間士子沿明季舊習互相標榜標錫嘗述海鹽吳

忠節麟徵語訓其子隴其曰居官不入黨秀才不入社

便有一半身分又嘗云貪與酷皆居官大戒然貪而酷

人皆知惡之若自恃廉謹而刻以繩人人慕其風節競

相倣倣禍不可言矣居嘗教子弟必令篤實務本子卒

成大儒贈靈壽知縣 平湖朱志參 三魚堂集

陸洽原字嗣開以拔貢授汶川知縣汶故羌番錯處復遭張獻忠殘殺民盡逃亡洽原招徠勸耕省徭息訟丁艱

歸著有話山集

吳志

陸懋字林士以貢授盧龍知縣莊旗人例不得用笞杖乃削木槌槌之兵弁有強買者輒捕治咸肅然帖服官署蕭瑟如禪寮以懇直忤上官被劾即步行出署行李惟來時敝篋書籍而已懋於經史無弗究詩文峻潔性狷謹即卑幼之喪未嘗或忽終身無疾言遽色著有鵲亭

集行世

畿輔通志參檇李詩繫受中錄

陸瑤林字以攻以進士授金谿知縣慈惠尚德化丞陳某

逋公帑繫獄代償得脫又為貧民償積逋乞養歸著有

聽松軒詩集

邵延齡字大年以進士除內閣中書逆藩吳三桂反西南用兵同官某當隨征延齡以其母老請代參畫軍事多中為靖逆侯張勇陳平蜀方畧勇悉資之終刑部郎中著有耐軒稿

以上吳志

倪思恂字宏方由貢任金溪丞耿逆遣偽將圍金溪躬率

民兵捍禦仗劍先驅死之祀名宦

平湖高志

楊燦字葵齋以進士知清豐縣時征蜀兵駐郊外燦營芻芟絕不累民有孕婦驟死莫得致死者燦齋宿城隍廟

夢兩月在天一婦抱嬰兒哭訪拘李閏月者一訊伏罪

入為御史疏陳祀事之重糾陪祀九卿又請廣正途遴

選以母老乞歸

吳志

倪淳字東岩舉人持身甚嚴不苟言笑制藝一準先民

平湖志

張志

陸萊原名世枋字義山長庚曾孫進士舉鴻博授翰林院

編修主福建鄉試直南書房出五臺金蓮花限韻賦

詩立奏稱

旨尋召翰詹八十九人試以豐澤園賦理學真偽論

上親擢第一遂由宮贊陞內閣學士兼禮部侍郎長至奏勾決

出矜疑二十餘人乞休著有雅坪文稿十卷詩稿四十

卷

浙江通志參毛西河文集

沈宏勳字又召以進士知吳堡縣請緩徵輕徭均役勸農

課士勞卒官趙光緒字襄孫以進士知寶雞縣在任八

年囹圄時空行取道卒倪淑則字貽孫貢生王素行字

繪先諸生金廷煌字旭昌諸生陳榮樟字楚材諸生以

曾孫嗣龍贈編修曹宗柱字星佑諸生皆陸清獻弟

子淑則從學最久受小學近思錄等書恪守躬行廷煌

榮樟宗柱皆以孝友稱素行家極貧讀書道院日惟噉

粥隆冬猶擁葛衣志節堅定閭然為己誤清獻年譜宗

柱參訂三魚堂諸書與清獻子宸徵金山李鉉重輯年譜後吳光酉復加編次知府吳永芳梓行宸徵字直方監生其兄定徵字儼若有志操清獻嘗謂其漸知聖賢門路早卒

吳志參平湖張志王志

高士奇字澹人由諸生入太學以書法稱

旨注翰林授詹事府錄事歷陞少詹歸里尋

召赴史局又以養母假歸晉詹事復即家拜禮部侍郎兼學士士奇性耽書凡祕府典籍悉資討論才情敏妙侍對詩文應聲立就縣有馮氏舊圃構江邨艸堂居焉事母至孝居鄉謙和妻歿終身不畜姬妾卒謚文恪著左傳紀

事本末松亭紀行扈從西巡日錄江村銷夏錄編珠補遺等書外詩文雜著二十餘種凡一百六十餘卷子輿

軒輿見下

浙江通志參平湖高志

陸祚蕃字武園以進士授翰林院庶吉士陞雲南道御史時議蘇州設駐防滿兵祚蕃上疏畧曰無事之地多設一兵則要地之兵力分而又為之移節往來使士卒有奔命之苦地方有供應之繁則不特兵分而餉亦絀省一無益之兵即省一必需之餉省一處無益之餉即可養一處有益之兵奏入

詔報可尋又上歲終核實疏遷登萊參議察冤獄翦豪強止開

礦補貴州糧驛參政值安順兵變單騎定之著有滄意

齋草粵西偶記子鼎揆戶部員外

吳志

談允誠字孚上以進士授內閣中書出守鎮江地當南北

孔道兵民雜處允誠律以至公姦豪屏跡嚴絕苞苴風

節矯然子紹芳舉人

浙江通志參平湖高志

曹志周字微之以進士授南江縣課農桑勤開墾又設義

學日與諸生相切劘終工部主事

陸炯字石年幼孤事祖母暨母孝叔貧有幼子寄養他氏

攜歸撫之年六十成進士知太谷縣陞御史巡城內監

騎馬入公署指稱銜貴戚諭炯械之奏請置重典

以上吳志

邵鳳起字蒼馭以舉人授歙縣知縣有以謀財致殺控者

訊之莫得埋尸處翼日以公事過南山下見鴉數萬飛

鳴團集不去隨於其處掘得尸遂伏法再補廣東增城

兼攝順德治行一如在歙縣

張志

沈屹字撫辰以舉人任鎮海教諭捐俸修舉學宮子之鉞

以舉人授羅次知縣便宜出倉粟賑饑全活無算卒官

吳志參平湖張志

沈崐字玉山以進士知徐溝縣有貧民投牒以子客死欲

嫁其婦婦至涕泣願終守崐給俸令勿嫁越三日客者

歸內陞戶部員外著有味菜山房集禾畊詩餘

吳志

馬煥曾字學海以貢選湖北布政司經歷楚督標裁兵兵

據城亂逼死重臣煥曾乘賊兵出行汲微服遁晝夜徒

跣抵上蔡飛羽轉報復奔河南巡撫痛哭乞師得及期

會勦陞南安知州

平湖高志

馬千英字序皇以進士授荔蒲知縣洞瑤肆掠入重險諭

降之悉歸所掠子女請立堡捐山田募土著耕守禁俗

私復讐丁憂起補太康河溢憐民遠役卽工所僱築葺

先賢陳子禽高子羔祠貯五經子史性理等書令諸生

肄業親為講解卒官

平湖高志

屠肇臨字臨宜以貢任太平教諭力端士習尋乞歸授徒

以古誼接引後進病亟戒子孫治喪不用浮屠

平湖張志

高興字與亭以進士改翰林院庶吉士授編修奉

命卽家校刊佩文齋咏物詩選及淵鑑類函書成補原官尋奉

旨纂駢字類編未竣卒興慎重謙和不立崖岸好施與戚友待

以舉火者甚衆著有谷蘭齋集子嵩別見孫澍字說霖

諸生官鹽大使署陝西靖邊知縣修棧道建養老書院

卒官從子衡字南岫以續成駢字類編補行人擢刑部

主事出為福建糧儲道以清勤著

吳志參平湖張志

胡紹安字國期以進士授武清知縣捐俸鬻己田償供應

免紅剝船變價諸累雪寃獄修學官卒官祀名宦

馬焯字怡齋父嘉棟字楚臣諸生焯以進士授邱縣知縣

歲饑勸賑寬徵行取不赴著有古今文集

以上平湖高志

盧生甫字仲山父開顯字備人生甫以進士知山東定陶

縣值軍需供應纖毫不以累民尋擢知州內陞刑部郎

中出知遵義府民有兄弟爭產者訟數十年生甫曰吾

兄弟雖有產誰與其繼之以泣民感動相讓著有孝經

注讀律質疑東湖乘受中編

顧麒錫字作三父天健績學攻苦著四書一貫講義麒錫

以舉人除當塗知縣緩賦恤民困善析疑獄同榜舉人

胡馬瑛字近顏知高明縣興學校勤撫綏持法不畏強

禦卒官友人張可大為扶櫬歸

以上平湖張志

金南鏐字夏聲諸生嘗校刻沈季友橋李詩繫行世朱檢

討彝尊稱為時賢所難以貢授工部屯田員外監督南

新中南兩倉高安朱軾以清慎薦陞刑部郎中出為陝

西驛傳道以直忤上官尋告歸孫樹屏字玠堂以監生

任衛輝知府河決編竹筏渡民設粥廠以賑罷歸起補

保定府通判卒官

施宗遠字廷樞幼孤育于祖母楊以舉人知湖廣羅田縣

縣多盜設法禽其魁餘黨斂迹暇輒進諸生論文藝詢

民利病乞休士民祖送數百里外

鍾彝字尚殷以舉人授黃安知縣治民不用鞭扑絕苞苴則姦蠹歸仍授徒自給有賓實叢書蘿村雜誌夷白堂詩稿粵西漫遊集以上平湖高志參張志

陸奎勳字聚緝好學博覽工文辭侍從父閣學棻於京師名噪公卿間年五十八始舉於鄉成進士授翰林院檢討大學士白潢欲特薦固辭尋乞休為人寬厚不為峻削之行文辭如其人好接引後進於里中結洛如詩社一時風雅振起著有陸堂易學詩學今文尚書說春秋義存戴禮緒言魯詩補亡陸堂集所纂輯江西通志浙

通志

平湖高志參蘭玉堂集

陸綸字懷雅奎勳次子以舉人授內閣中書出為梧州同知巡撫金鋹延修廣西通志欲以博學鴻詞薦固辭擢永州知府值苗警大軍屯武岡水陸供應不絕善為裁酌以寬民力丁艱起補梧州俗以壻為子寡婦多贅夫於家往往爭產構訟綸反覆啟其廉耻俗漸革靈雨壤民居捐俸為葺茅蔽之字民慈愛多類此民稱為佛子著有允齋詩集子誌字心之嘗捐貲贖宗祠官福建清流鐵石磯巡檢卒官貧幾不能歸櫬

楊翊時字木臣少孤依兄標讀書以舉人除兩淮斜角場大使遷四會縣知縣俗奢矯以節儉吏民化之年老改

鎮海縣教諭

馮巨欽原名鈿字愚堂千英子以舉人除南部知縣縣多

咽喉子好鬪訟為民害巨欽威德並施乃戢修學宮創

義塾上官重其廉能委署保甯鹽茶同知卒官以上平湖張志

張鍾秀字鴻漸以進士授孝感知縣首重文教朔望集諸

生課學尋罷職總督邁柱令輯湖廣省志稱精核復襄

陽知縣署知府未幾卒著有過耳集詩稿平湖高志

陸培字翼風以進士授東流知縣水災請緩徵撫卹周至

山溪捕魚者夜斃于石莫得兇首培招眾予食察左手

食者目動一訊即服署貴池釐剔胥役侵蠹嚴捕盜法

俸入分餽故鄉貧戚罷歸貧甚僦屋以居工詩詞仁和

杭世駿錢塘厲鶚皆相推重著有白焦詞四卷子錫周

字魯東舉

陸汝欽字恪庭以進士授湘潭知縣巨豪為暴廉其實置

之法改温州府教授以憂歸養殮不繼杜門課子晏如

沈廷陞字廉叔以舉人除奉化縣教諭陞綿竹知縣改納

谿厯有清操中年喪偶不娶敝帷木榻官舍如僧寮著

有硯還齋詩存

林鏞字御驤以舉人除福建鹽課大使補海澄知縣俗桀

悍鏞撫馭有方創儒山書院以振士風改青田教諭勤

於造士鄰縣有好學者亦招致之卒官

吳嗣爵字尊一其先錢塘人祖之錡遷平湖嗣爵以進士授禮部主事改吏部累陞淮揚河道洪澤湖決總督高晉議開天然壩嗣爵曰於減漲誠便然如下河郡縣百萬生靈何持不可遷淮徐河道徐州黃水大溜直逼徐家莊居民倉皇謀竄時大風雨嗣爵躬率吏鳩工堵築撤蓋端坐堤上當其衝屬吏惶懼勸退不顧逾時溜勢仍歸中泓若神助然擢河東總河徧閱江淮及海口加築臨黃纒堤疏濬雲梯關舊口治清口東西壩高堰奏移建頭架於第五木龍下以護新灘使黃水直

逼陶莊清水抵惠濟祠後未幾清黃盛漲徐州城得免潰決嗣爵復於傅家窪導入唐家灣疾殺其勢二日平

一夕風雨暴作黃水泛濫嗣爵急集船濟民登高阜給蘆蓆棲止開倉賑卹晝夜出入泥潦間遂病肺嗣爵治河久全河形勢瞭若指掌而臨事審幾明決不爲浮議所奪故屢施奏績轉吏部右侍郎尋告歸卒

張鈞字廣朋幼好學夜燃燈帳中讀書帳盡黑以進士分發江南補金山知縣移清河歲饑設賑躬親巡視蝗災亟撲捕禱于神一夕驟雨驅蝗入海歲以有秋病乞歸賈三登字庸塾少孤家貧以吏員授安徽涇江巡檢民有

嘉興府志 卷五十八
五
訟開誠勸化未嘗行杖衛軍與民訟蘆地勘實歸諸民
請立社倉添防汛省徭役凡有益於民條之上官無所
忌乞歸民泣送數十里祠于狄梁公廟廡歸里後親知
不能婚葬者常典衣炊助

翁維正字甯文幼醇篤研究性理語類諸書以歲貢除長
興訓導日坐明倫堂與諸生論學學田爲豪右佔請上
官復之以贍寒士

許時杰字德超三歲孤母朱撫之成進士授福建邵武縣
知縣請免虛糧整理樵川書院捐建拿口橋捍禦黃源
虎患卒官

屈學洙字東萊由監生仕至雲南大理府通判初入滇道

經黃平州值苗警從者皆股慄學洙單騎馳至署整飭

備禦尋以解糧染瘴卒江甯旅次祀名宦

以上平胡張志

袁珂字雪巖其先華亭人祖國梓官嘉興府知府父勳遷
平湖珂以貢生由正黃旗教習授河南儀封知縣儀濱
大河歲派夫挑築珂力陳得免建議鑿井灌田詳明漕
項免徵本色署睢州斷治縣豪殺人二獄時以爲神引
見條奏兩河利弊甚悉陞陝州知州濬河漑田逾年免歸民遮
道泣送其後河南饑刑部侍郎王士俊奉

詔發粟命珂專司賑事兼墾光山縣荒地數萬畝授兵部員外

歷刑部多所平反擢山東兗州府知府改陞工部郎中

乞休道卒弟頊字衷翼工詩善書官裕州知州嗣子鑄

由監生選授衡陽知縣 平湖高志參
平湖張志

程本敏字秀山以貢授梧州通判歷署興業知縣象州知

州攝守梧州民苦浮糧丈地清之擢宣化府同知杜苞

苴戢姦宄西陲用兵以辦軍需紀功乞歸養

李青字仿蓮以進士授普甯知縣歷陽江欒城勸農興學

設留養局賑粥撫綏流民以勞卒官

胡涵字太初以舉人授內閣中書出為廣平府同知改河

西務地為南北水驛衝衢調劑無缺暇賦詩自娛貧不

顧卒官

馮廣譽字叔颺以進士除容縣知縣甫至有袖金謁者卻

之每夜躬自巡邏遇宦家子挾妓博者懲治不少貸建

書院以興文教年老改處州教授修學宮勤講課歸貧

甚未嘗一干有司

錢大經字虞惇父許瀄布衣授徒以給大經攻苦力學乾

隆丁丑以進士選翰林院庶吉士散館授編修卒官 以上

平湖
張志

顧天挺字松來以進士知滎陽縣釐剔豪強侵佔以均田

賦歲饑捐賑軍役不以擾民內陞中書乞養歸時從陸

清獻講學校刊學部通辨清獻稱其有衛道功志伊

袁安字石庵以進士知興化縣署荆溪有程氏奴自殺其子誣其主讞成繫獄安至察其冤置奴于法尋以病歸

祀名宦志伊

徐鴻昇字鳳苞以進士授甯鄉知縣縣豪賂結官長為民害鴻昇至豪以千金饋拒之後廉得其殺人狀伏誅益陽水災往勘撫卹周至會逸囚落職生平耿介自守家居四十年不謁官府志伊

陳朗字太暉以進士授刑部主事陞郎中出守撫州俗好私謁朗悉謝卻接僚佐和易不拘禮節及鞫事侃侃與

上官爭不少假葺興魯書院以學行矜飭士習一變丁憂歸卒著有青柯館詩鈔志伊

陳循古字邃堂乾隆丁酉舉人朗子任直隸文安縣知縣伉直有父風上官器其材欲援引之循古恥干進托故辭居官清介卒後家無餘資同人醵金為助方得歸葬屈橋年字若倉附貢生究心先儒書敦內行嘗面斥人過華士畏服居喪悉遵家禮不用浮屠法人咸稱之志干沈初字景初明江西參政煉之後以

召試授內閣中書成進士授編修累陞禮部侍郎調吏部遷左都御史授軍機大臣改兵部尚書兼署吏部復改戶部

賜紫禁城騎馬一主鄉試五任學政一知貢舉一充會試副總

裁歷三通館

實錄館副總裁卒官

賜祭葬謚文恪初本生父發別見嗣母陸初事之孝家事至老

不敢專少工文辭同郡錢陳羣長洲沈德潛皆以大器

期之既通籍

內廷事

兩朝三十餘年著有

御覽集蘭韻堂詩文集伊志

陳嗣龍字劭園垂髫後授書過目不忘年二十三以第三

名進士授翰林院編修累官至都察院左副都御史性

鯁直敢言遇權貴人無所撓屈三充順天分校官五主

鄉試一任學政一為會試副總裁得人最盛尋以言事

左遷歿後復四品銜于志

全璠字慕蘭監生以供事議敘選潮陽縣招甯巡檢乾隆

甲辰有聚眾械鬪者璠聞報即單騎馳往開誠勸諭懲

其為首者眾遂斂戢丁憂服闋揀發東河署頓莊閘官

啟閉蓄洩悉協機宜漕艘過汎挽送無滯陞夏津縣主

簿卒于官于志

沈廷烜字南義由監生選授安徽甯國府照磨會廬山異

嘉興府志 卷五十八
三
教以滋事拒捕臬司李世傑檄廷烜按問廷烜馳往先
諭以大義衆皆帖息不敢動乃擒治其魁世傑深器重
之調署岳山縣興水利除強暴數月而民情說服尋陳
情歸養父沒遂不復出年八十舉鄉飲大賓卒年九十
有二十

于志

楊馥孫字芬若以諸生充四庫館校錄嘗攝湖北宜都縣
知縣邑舊多派累爲裁減幾盡民有號東山三虎者人
久患苦之捕得論如律調鳳翔佐理福公軍事有功旋
告歸不復出馥孫好宋元明諸儒書手錄至數百卷云

于志

胡德炳字宿午乾隆丙子舉人選授上虞縣教諭勤于課
士舉報優行皆寒賤

于志

王鳳鳴字協岐以舉人授景甯教諭循循善誘士咸愛之

于志

周用錫字晉園乾隆乙卯副榜歷署兩淮板浦豐利場鹽
大使時鹽務弊端百出用錫先後署事釐清積弊遂于
經學著有尙書證義

于志

陸紹曾字貫亭乾隆乙丑進士除靜遠知縣潔已愛民徵
辦金川軍需閭閻無擾俸入不繼每取給于家性質樸

告歸

于志

施峻字翼垣乾隆壬申舉人歷署直隸靈壽南樂龍門等縣補肥鄉知縣汰陋規減雜徭恤熒獨民咸德之性慈祥不輕用刑或有干以私者必正色拒之病假旋里尋起署新樂復任肥鄉以逸囚落職去官日行李外圖書兩簾而已于志

何永溱字元培庠生由四庫館謄錄議敘州同分發甘肅歷署縣丞通判補甯夏府靈州州同地當番回雜處俗尚兇頑號稱難治永溱諭以理義民皆嚮化嘉慶元年歲歉收散給口糧積勞成疾因解組歸于志

施天苞字應午乾隆甲午舉人歷任海甯諸暨教職性純

孝宗黨之近者婚娶喪葬皆身任之在官屢有修建于志

張儀盛官福建興化府通判明決寬惠有政聲善鞠獄多平反興化木蘭坡瀕于海海水漫溢淹及田廬儀盛稟請修築躬任其勞築堤若干丈民田賴以無患興化饑白上官力請採買平糶多所全濟云于志

何世榮字振威嘉慶戊辰舉人歷任青田富陽教職嘗捐俸修學歲飢奉檄辦賑親自查給使貧戶得沾實惠尋卒于任于志

孫元字敬夫乾隆丙午舉人性恬淡任壽昌教諭學問操守為士林矜式于志

吳敬字式如號崧圃侍郎嗣爵子乾隆戊戌進士由翰林

散館授編修擢侍講學士戊申充陝甘正考官擢安徽

學政改授河南開歸陳許道累升布政使 賞戴

花翎時值楚陝教匪滋事會辦防務軍需實心任事嘉

慶己未遂授東河河督尋調江南河督以堵閉邵家壩

大工告蕺晉太子少保銜入爲兵部右侍郎調督倉場

丙寅復督東河入爲刑部尚書 賜紫禁城騎馬

己巳復授江南河督左遷光祿寺卿擢吏部右侍郎尋

奉命閱視江南洪澤河情形適常州府屬靖江縣江漲

齧堤城垣危甚議亟築碎石堤臨江捍禦居民賴以安

堵甲戌再督東河東省運道淤塞倡議疏濬韓莊之微

山湖由八閘下注江漕艘便之入爲兵部尚書調刑部

充經筵講官庚辰授吏部尚書協辦大學士復署東河

河督道光辛巳以疾告歸敬未顯時侍父任所已熟悉

水道形勢比受特達之知亦治河爲最多時黃河屢經

漫溢各工敝壞已極修防宣洩動協機宜伏秋大汛親

駐河干督率搶護靡不化險爲平去任後每遇要工輒

銜命相度刻期蒞事 御詩嘉獎賞賚優渥子元

凱自有傳公謹從一品蔭生官廣西鬱林州知州新纂

朱爲弼字右甫號茱堂祖英父鴻猷有傳爲弼幼失怙恃

事祖母高以孝聞通經學尤嗜金石爲儀徵阮元所器
重舉嘉慶乙丑進士由兵部主事歷員外郎道光辛巳
授河南道監察御史疏言江西閩浙連界多封禁山流
民潛匿請嚴禁杜奸匪滋事轉掌京畿道值畿輔被水
疏請撫卹升禮科給事中時順天各屬捕務廢弛江蘇
山東劫掠多案疏請整頓緝捕稽查海運倉以侍郎和
桂張映漢覆奏豆石微變情形不實疏劾之鞠實論罪
如律復疏言江蘇省海口壅塞浙江上游受害請乘水
潦未降疏濬劉河吳淞太湖授順天府府丞升府尹累
擢至兵部右侍郎授倉場侍郎尋總督條奏漕運章程

十條因病開缺卒年七十爲弼在諫垣疏凡二十餘上
侃直不阿服官內外三十餘年不喜躡進以勤慎廉潔
受知歿後家無餘貲士夫重之請入祀鄉賢祠

旨允之著有葦聲館詩文集續纂積古齋鐘鼎彝器款識吉金
文釋鉏經堂集古印證等書弟爲霖字雨甫以諸生官
江西另有傳子善旂字建卿舉人國子監助教善驥字
子良舉人官福建順昌等縣知縣署海防同知所至均

有政績

新纂

沈學詩字涵之號筠垞廩貢生好學工書屢試不第會楚
蜀軍興握槩從戎蜀帥勒宮保奇其才羅致幕下事定

敘勞遂由什邡尉梁山丞遷慶符令以丁母憂歸服闋
起知溫江縣調成都縣所至催科不擾讞獄得情豪猾
屏息庚辰辛巳間攝敘永同知大吏以廉卓薦於朝超
遷行有日矣又以父憂去喪畢廬墓以居蔣相國攸銜
時帥直隸郵書強之起甲申冬除奉天海城縣縣濱海
地僻民不興學爰立義塾給膏火拔王衷亮於童試飲
食教誨卒成進士民始競勸軍屯田增租議起再三力
爭事得寢公退之暇手不釋卷在遼三載兼攝奉天治
中新民同知蓋平廣甯知縣以勞瘁卒于官

沈氏家
乘纂

李浩字紹揚號養齋拔貢生歷任常山武康訓導旋補桐

廬教諭桐邑有鄧生者因王某謀命逃匿波及其家浩
察其無辜偵知逸犯在烏龍嶺密率家丁數人捕獲焉
上官奇其才保舉知縣嚴子陵釣臺久圯巡撫阮文達
欲鼎新之瀕江俯瞰築堵頗艱浩奉檄承辦并爲修謝
臯羽墓上游益以幹練重之未幾卒於任著有停雲閣

集八卷

新纂

楊于高字振巖號蘋香嘉慶庚申舉人已巳成進士歸班
選授四川彭水知縣除暴安良盜賊屏息嘗患士風不
振重建摩雲書院延師訓誨之道光辛巳分校鄉闈旋
赴部引 見遂乞歸于高長身玉立下筆千言立就

著有蘋香詩鈔退筆山館文鈔

新纂

朱壬林原名霞字禮卿號小雲家貧力學嘉慶庚申舉於鄉辛未以第一人成進士授庶常散館簽分工部主事道光壬午充雲南副考官歷員外郎郎中戊子擢山西道監察御史時運道淤阻疏請籌濬徒陽運河轉掌京畿道旋署給事中疏言三江兩湖等處均被偏災正供缺額請於陝西河南山東量為採買以實京倉壬辰擢永平府知府升清河道值西舶至天津與協戎向榮商略防務策戰守協機宜會兵撤不果行旋署直隸按察使以憂歸嘗慨吾湖先達遺文散佚爰與邑中顧廣譽

葉廉鐸賈敦艮陸潢輩搜羅商榷得文百餘家錄五百餘首編曰當湖文繫經燹幸存家居之日讀邸抄凡關係時事者必手鈔錄適東南告急國是縈懷聞捷則喜聞警則憂林下水邊不忘魏闕自奉儉約而戚族待以舉火者數十家丁巳重遊泮宮適長子壽熊亦登黌舍晚年雛鳳目覩楨芹先後名第相符邑人傳為美談焉年八十卒著有小雲廬詩稿刪存五卷晚學文稿八卷當湖朋舊遺詩十卷當湖文繫二十四卷俱刊行

新纂

陸堯松字少廬嘉慶戊午舉人辛未成進士由庶吉士散館授刑部主事道光乙酉充貴州副考官尋擢兵科給

事中時刑部核議外省立決題稿祇交書吏呈閱司官雖署名不復上堂畫諾堯松上疏請復舊章以重民命時論是之尋乞病歸

新纂

韓維壻字配賁號桐上拔貢生嘉慶丁卯舉順天鄉試甲戌成進士以咸安宮學教習選湖北穀城知縣旋署天門調黃陂所至有惠政升武昌府通判歷充乙酉戊子壬辰甲午等科鄉試同考官在黃陂時適大水設粥賑濟民活者萬計生平博學精賞鑒家有金籙山房金石書畫收藏甚富人比諸項氏天籙閣著有金籙山房

詩藁四卷

金籙山房詩序
參龍湫嗣音集

徐士芬字誦清號辛庵夢熊子舉嘉慶戊寅鄉試第一明年成進士由庶吉士授編修道光年兩充江南鄉試正副考官一充順天鄉試副考官癸未充會試同考官甲辰充會試副總裁擢廣東學政順天學政歷中允侍講庶子充日講起居注官入直上書房尋晉秩至戶部右侍郎兼管錢法堂事務因病告歸士芬幼失怙恃刻苦自勵通籍後在工部久於圖法多所整飭尤究心畿輔水利嘗於直廬隙地試植水稻有效會天津因洋務增兵遂上疏請舉行屯政開墾水田雖以兵撤不果行時論韙之凡校士者七方正嚴毅弊竇肅清既歸里倡修

節孝祠並重建萬程橋未竣工而卒入祀鄉賢祠所著
有漱芳閣詩文集弟士蘭字香晚庠生官福建沙縣連
城縣知縣有惠政子元錫字伯蕃江蘇補用道瀛錫字
仲萊兩淮候補運判申錫另有傳新纂

陸炯字戒三號蘧村郡廩生嘉慶甲子登賢書庚辰成進
士由庶吉士散館選湖北公安知縣仕至武黃同知任
縣令時有某宦豪橫每遇巨案匿首於家上官束手無
策炯一日過市適某糾眾行得輿夫暗點喝役擒莫應
急親率二丁拏回訊禁一邑稱快興建書院獎勵士林
分校鄉闈尤稱得士服闋後選四川綿竹縣知縣淡於

榮利旋解組歸淹貫經史於六書尤精邃著有音義叶

通說文類編新纂

陸沅字冠湘號芷江父錫麒優貢生沅生而穎異十歲徧
誦十三經及史漢文選舉嘉慶辛酉鄉試年僅十有七
庚辰成進士由庶吉士改雲南祿豐縣知縣調順甯丁
父憂服除授河南甯陵縣甯陵地當孔道凡解餉解犯
採辦硝磺所需車馬夫役均輸自民間沅至悉捐廉官
僱是時銀價騰貴州縣徵解錢糧苦賠累鄰邑輒籌增
益沅獨持不可曰此加賦也民即勉應於心安乎調署
內黃內黃為通省糧艘開兌之區酌定辦漕章程稽察

覈實旗丁肅然尋回原任以疾請假囊橐蕭然未及歸

卒新纂

奚澄字印川號蘭巖少孤貧攻苦力學副貢生嘉慶辛酉舉人道光壬午進士以知縣分發直隸值正定等府州大水委勘放賑觸暑單車不辭勞瘁補新城知縣村人有抱病遠歸至夜刀傷暴卒澄素精岐黃知為扣頸傷寒痛極自刃絕不累及無辜民皆稱之後以呈誤去旋選廣東平遠縣卒以直道忤上官臨行父老攀轅一如去新城時澄生平經學與同邑丁泰並稱著有十三經註疏彙考一百二十卷學使羅文俊賞為有用之書攜

歸擬錄副本焉新纂

徐應照字鑑堂號秋曉道光癸未進士以知縣籤發廣東攝陽江授高明署南海補番禺番禺繁劇與南海等前令虧帑萬力任之值委勘東莞民爭溝械鬪案巡撫派營弁率兵從輒先弁馳往至則民間應照來釋械聽斷遂開水溝溝有船焉兩造曲直分訟遂息粵東海汊遼潤潮來沙漲豪富佔墾數年即請升科恒至爭奪釀案應照力陳不可論者避之番禺城外有被劫者營弁擒交數盜見有火烙滿身鞠之不實翌日衙參上臺以巨盜已獲賀應照堅不承至拂憲意辭出越三日卒獲真

盜報最升佛山同知因親老告歸家居不與戶外事而歲荒糶賑水潦疏濬以及修城垣建碣石無不首先倡輸雖數千金不吝鄉人德之新纂

倪承弼原名樹德字蓉齋號蒼溪嘉慶辛酉舉人道光丙戌大挑知縣分發直隸操守廉潔精於讞獄總督那彥成委拏天津白糧幫滋事水手力獲要犯十七名餘黨解散丁母憂服除補西甯縣調懷來蔚州富室劉廷璽少孤力學乃祖舉人某耳聾病廢其叔覬產捏控誣璽忤逆適委承弼覆讞廉得其實力為昭雪並嚴坐誣告者廷璽尋入邑庠遠近稱頌調東安修葺書院整頓捕

務尋忤上官罷職卒以孫寶璜官累贈至資政大夫承

弼官直隸久於畿輔水利尤所洞悉嘗刊圖說一冊有

裨吏治同治丁卯入祀鄉賢新纂

李泰壙號石渠嘉慶丁卯舉人道光丙戌大挑知縣分發

江西署崇義篆邑為江省邊境士不知四聲公餘切為講解始知韻語署吉水調彭澤補餘干癸巳夏餘干大水乘暑往勘吏請少息泰壙曰邑宰親民之官民被災宰憚暑可乎不數日中暑卒新纂

時樞字慎子號秋鶴廩貢生選授餘杭訓導力學通經嘗以漢儒毛氏亨有功詩教上書大府奏請從祀格於吏

議同治二年奉

旨以毛亨從祀足徵樞持論在先非無卓見事親孝母病日久
 乃研究岐黃通其奧治之卒復明居喪時祭均遵古禮
 其秉鐸餘杭捐葺黌宮倡建茗南書院刊洞霄宮提舉
 題名記得黃忠端公遺像勒石洞霄宮後閩人刻忠端
 集即用石本摹勒卷首精音律學中樂器次第修整教
 弟子肄習焉著有禹貢述詁四卷詩經說志十四卷

日記參
蹄泔集

錢福昌原名攀龍字超衢號辰田祖亮子舉道光戊子鄉
 試明年成進士臚唱榜眼辛卯充江西副考官擢廣西

學政丁父憂服除授江西道監察御史轉掌貴州道擢
 河南學政按試各屬約束書吏廉從稽察綦嚴教官月
 課飭解到院以憑核實試竣集文行兼優者調省月試
 士習丕振掇巍科者相繼先是己亥秋福昌方試歸德
 奉

廷寄飭查衛輝府汲縣邪教福昌扁試如常而密令弟祐昌
 與子鎮奎為商人裝廉得實

旨嘉獎特擢內閣侍讀學士任滿歸省以母老不復出

新纂

張金鏞原名敦瞿字良甫號海門拔貢生道光戊子順天
 舉人辛丑成進士庶常散館授編修丙午暨咸豐壬子

兩充順天鄉試同考官乙卯充山西鄉試正考官旋擢
 湖南學政丁巳陞翰林院侍講以母憂歸遂卒金鏞早
 擅文譽京朝耆碩交口推重道咸間王文恪杜文正皆
 金鏞座主絕不私謁居館職十三年不遷敝車羸馬自
 得也為文博儷谷藻晚益峭宕詩好深湛思尤深於詞
 歷持文柄執法森嚴試沅州日表黔烈女楊投水處移
 牒郡守為雪其冤犯者斯得手為文以紀之其維持名
 教如此著有躬厚堂詩集絳跗山館詞新纂

吳若準字子萊號次平父元覲列孝友傳若準由戶部額
 外員外舉道光辛丑進士實授河南司員外郎擢江南

道監察御史婁縣知縣因信任漕胥催徵不善毆斃民
 命幾及百人時議翻以聚眾滋事定讞若準抗疏歷詆
 其妄奸吏得以伏法咸豐癸丑擢禮科給事中尋升內
 閣侍讀學士加三品頂戴故事請

旨簡放學政未預考差者例不列名至是特擢若準江西學政

蓋異數也在任升太僕寺卿卒新纂

何紹瑾字蓮友號藹卿少穎悟道光乙未舉於鄉辛丑成
 進士授吏部主事為尚書恩桂所器重訪以時事直言
 無隱壬寅西人構兵座主參贊大臣文蔚督辦浙東軍
 務奏請從事陳十策皆戰守之要有沮之者不果行尋

丁父憂歸葬畢結廬墓旁督課諸子服闋京洛故人致書勸駕終不復出辛酉粵匪陷平湖以憂憤卒所著有毛詩辨韻四卷三江考一卷經史輯要四卷兩浙輿地形勢說二卷新纂

徐麟原名應麟太學生援例除順天宛平縣齊家庄巡檢地窮僻人不知學麟葺古寺為義學分寺田以贍膏火民始脩文壬寅調武清縣河西務巡檢時永定河尾閘數為邑患力請大府濬河增築鳳河隄延袤數十里戊申霪雨為災佐令勸捐設廠煮粥以賑庚戌陞豐潤主簿咸豐癸丑粵逆擾天津距縣甚近邀紳議募得二萬餘

人畫訓練夜巡警城賴以完旋丁母憂歸著春暉堂文

集新纂

卜葆鈞字尹甫號達庵廩生試輒冠其曹中道光丁酉副車已亥領鄉薦庚子成進士以知縣發四川甲辰題補大邑邑北界西藏號稱難治甫下車卽講行保甲令民家置器械以備非常復約鄰封互相搜捕因獲巨匪二十餘人悉置之法盜風用戢乙巳以勞瘁卒於任邑人思之祠於靜惠山之平雲亭亭故祀范鎮陸游而以葆鈞配焉葆鈞未達時脩脯所入供家人食指外能周戚

姚轡均字琴如號柳隱道光己亥舉人選授天台教諭天台山多田少民恒病饑爰議建社倉積穀至萬五千石建嬰局創書院修學宮同治丙寅臨海張建垣抗糧一案株連甚多轡均權臨學篆無辜得釋陞湖州府學教授廉介不異在天台時年七十七卒於官

行述纂

方垌字思臧嘉慶丙子舉人始工詩出入于唐宋諸大家間中年篤志程朱之書毅然行之雖貧病交迫不顧也攝武義訓導非其義一介不取爲教恪遵小學近思錄反覆曉解士子翕然信從執經問業者滿于庠序邑中耆老以爲百年來所僅見云連丁內外艱寢苦枕函悉

準禮經服闋後選授錢唐訓導未抵任卒年四十有三著有生齋自知錄生齋日識讀易日識與詩文集諸書

子金彪諸生亦好學早卒著有寅甫日識

子志

顧廣譽字豫康號訪溪咸豐壬子優貢生撫臣應

詔薦舉孝廉方正以疾辭不赴廣譽少卽有志正學言動不苟居父母喪盡哀盡禮一遵古制與同里方垌爲道義交垌卒於省邸廣譽奔護其喪復爲醵金刻其遺書晚益肆力於古自漢唐以來儒先疏義并宋元明諸儒暨張楊園陸清獻各遺書博觀約取反已自得而精力尤萃於毛詩家貧課徒自給四十餘年晚主講上海

龍門書院嘗謂教術不可不慎若師道不嚴他日登之仕籍必無可觀故其誨人也尤以正心術為先卒祀鄉賢著有悔過齋文集學詩詳說四禮權疑鄉黨圖考補

正等書

新纂

黃鵬飛字健凌號曉嵐道光甲午舉人咸豐庚申賊擾平湖鵬飛糾鄉子弟保聚海濱勢不能拒散眾家居叱咤欲自盡一日他出不歸蹤跡之數日里人來告知獨居空室中絕粒求死子福增趨視之適氣絕事聞卹贈雲

騎尉世職

新纂

朱善張字子弓號山泉贛縣知縣為霖子少孤貧道光壬

寅海疆不靖以附生倡團練衛鄉里敘南河通判題補

桃源尋加知府銜咸豐甲寅以平徐海各屬擒匪功

賞花翎尋以道員用加鹽運使銜擒首張濞踞長

淮鹽道為梗善張乘夜破之焚賊船三十餘艘復以馳

勦天長粵匪功

賞庫木勒濟特依巴圖魯勇號

尋署淮揚道移駐揚州時揚已三遭蹂躪己未賊首陳

玉成復率悍黨數十萬來犯誓以死守卒保危城尋得

真除加二品頂戴擒匪陷清江善張諭民堅壁清野賊

因而竄得復其城移駐之兼辦徐州糧臺會僧邸勦擒

匪苗沛霖於蒙城善張由間道輸饟以濟苗逆平徐境

獲安甲子秋督兵赴沛剿辦畚匪以病卒於軍

賜祭葬贈右都御史銜蔭一子之榛知州祀名宦

新纂

徐申錫字叔成號勉如士芬子道光丙午順天舉人丁未

庶吉士丙辰授編修己未充順天鄉試同考官丙寅大

考二等擢詹事府右春坊右贊善轉左丁卯京畿亢旱

上積穀練兵汰官一疏積穀議准施行嗣因史館議敘

開缺以知府用遂南旋

新纂

謝榮照字春生號琴石拔貢生授禮部主事累擢員外郎

郎中同治甲子記名以御史用旋授廣西思恩府知府

適逆賊孫仁廣聚黨盤踞南甯府屬之山澤巡撫張凱

嵩統師進剿餉糈支絀奏委籌餉粵東得以協濟

賞戴花翎丁卯履思恩任郡遭兵燹招徠復業建義

學課農桑清詞訟屬邑上林有逆團李耀林者私設釐

卡劫殺民命擒斬之復獲馬亮何源海等皆陷城巨燄

置諸法戊辰逆匪王沆虧糾眾竄入武緣縣境督眾討

平之己巳調桂林壬申擢右江道旋署按察使

賞加二品銜

行述纂

倪寶璜字渭生號載軒道光己酉順天舉人咸豐癸丑以

知縣揀發江蘇甲寅署川沙廳同知邑甫經殘破捐貲

修城並練義旅有高金毛者乘間嘯聚東鄉擒斬之民

聶伏丁巳署武進知縣兼署常州府督糧通判核減漕

價民感動爭先輸納遂保升同知尋晉知府壬戌總辦

常州團練以擒獲通州教匪盛廣大等 賞戴花

翎甲子充江南鄉試內收掌會同考官鄧澤培病寶璜

代閱試卷得吳大澂等十七人皆積學士後歷保至道

政使銜

行述

嘉興府志卷五十一 三 聶伏丁巳署武進知縣兼署常州府督糧通判核減漕價民感動爭先輸納遂保升同知尋晉知府壬戌總辦常州團練以擒獲通州教匪盛廣大等賞戴花翎甲子充江南鄉試內收掌會同考官鄧澤培病寶璜代閱試卷得吳大澂等十七人皆積學士後歷保至道政使銜

